

# **Jendurreko Ikuskizunen eta Jolas Jardueren Lege Proiektua**

## ZIOEN AZALPENA

Euskal Autonomia Erkidegoak ikuskizunen eskumen eskusiboa du, Euskal Herriko Autonomia Estatutuko 10.38 artikulua xedatutakoaren arabera. Hori dela-eta, azaroaren 10eko 4/1995 Legea onartu zen, Jendaurreko Ikuskizunak eta Jolas Jarduerak arautzen dituen.

La hogeita hiru urte igaro dira lege hura onartu zenetik, eta araua tratatzeko modua birplanteatu behar da gizarte- eta kultura-parametro berrien arabera, kontuan izanik egun zenbat orokortu eta dibertsifikatu diren aisiarekin zerikusia duten jarduerak. Horren ondorioz, oreka bat bilatu behar da ikuskizun eta jolas-jardueren antolatzaile, ikusle edo erabiltzaileen sentsibilitate, eskubide eta betebeharren artean; baita jardura horiek burutzeak eragiten dituen hirugarrenekin ere, zeren haiek ez dute zertan jasan bizikidetzaren normalizatu batekoa baino zama handiagorik edo eragozpen gehiagorik.

Bestalde, aurreko legea aplikatzean izandako esperientziak adierazten digu komeni dela zenbait alderditan hutsune batzuk betetzea edo segurtasun juridikoa sendotzea; adibidez, ikusleen edo erabiltzaileen eskubideen eta betebeharren araubidean edota zehapen-araubidean.

Europako Parlamentuaren eta Kontseiluaren Barne-merkatuko zerbitzuei buruzko abenduaren 12ko 2006/123/EE Zuzentarauaren transposizioz, zerbitzuak emateko gaikuntza-tituluak arautzeko paradigma aldatu da. Ikuskizun eta jolas-jardueren kasuan, azaroaren 10eko 4/1995 Legea partzialki aldatzea eragin zuen horrek, eta aldaketa apirilaren 23ko 7/2012 Legearen bidez egin zen (Barne-merkatuko zerbitzuei buruz Europako Parlamentuak eta Kontseiluak abenduaren 12an emandako 2006/123/EE Direktibara egokitze aldera zenbait lege aldatzeko da lege hori). Lege horretan, halaber, Euskadiko beste lege batzuk ere aldatu ziren; esaterako, Euskal Herriko ingurugiroa babesteko otsailaren 27ko 3/1998 Lege orokorra, eta horrek aztergai dugun araudiari eragiten dio.

Aldaketa horiek, berriz, Batasuneko araudira egokitu beharra zekarten, zeinak alferreko izapideak ezabatu edo sinplifikatu nahi baitzituen, eta norbanakoen ekimena sustatu, segurtasuna eta bizikidetzaren zaintzeko interes orokorraren kaltetan izan gabe.

Lege berriak ildo horretan sakondu nahi du, gaikuntza-tituluak erraztuz, arlo desberdinetako araubideak bateratuz, bikoizketak desagerraraziz eta prozeduretako izapideak sinplifikatuz.

Legeak parametro hauek hartzen ditu aintzat:

a) Askatasun-printzipioaren eta segurtasun- eta bizikidetz-printzipioaren arteko oreka. Herritarrak aske dira aisialdiko moduak eta dibertitzeko moduak aukeratzeko, eta enpresek askatasuna dute hainbat motatako ekitaldi-zerrenda zabala eskaintzeko, muga bakarrarekin: segurtasun, bizikidetz eta pertsonen eskubideekiko errespetuzko arrazoiengatik interes orokorrak ezartzen dituen lege-betebeharrak errespetatzea. Arrazoi horiek justifikatzen dituzte alde batetik askatasuna eta bestetik ikusle edo erabiltzaileen segurtasunerako eskubidea, herritarren arteko bizikidetz eta hirugarrenen eskubideak bateragarri egiteko lege-neurriak.

b) Herritarrei ematea protagonismoa; horretarako, erabiltzaile edo ikusleen eskubide eta betebeharren karta finkatzen da, alde batera utzi gabe kontsumoari buruzko araudi orokorraren arabera erabiltzaile eta ikusleek izan ditzaketen beste eskubide batzuk.

c) Ikuskizun eta jolas-jardueren titular eta antolatzaileei erraztasunak ematea enpresa-jarduera horiek egiteko. Beraz, segurtasuna, babes zibila, ingurumenaren babesa, historia- eta kultura-ondarearen babesa edota adingabe, kontsumitzaile eta erabiltzaileen babesa tarteko direlako objektiboki beharrezkoa den jardueretan bakarrik eskatuko da jarduerak egiteko alde aurreko lizentzia edo baimena. Gainerako kasu guztietan, nahikoa izango da alde aurreko jakinarazpena aurkeztea.

d) Lokal publikoetako segurtasun-estandar teknikoak indartzea; aldi berean, zailtasun edo desgaitasunen bat duten pertsonen mugigarritasuna eta irisgarritasuna bermatzea. Lizentzia edo alde aurreko baimenaren araubidearen ordean alde aurreko jakinarazpenarena ezartzeak ez du esan nahi ikuskizun, jarduera eta establezimenduei segurtasun- eta kalitate-baldintza eskasagorik eskatuko zaienik, zeren legeak kontrol-eta ikuskatze-araubide zehatza jasotzen du eskakizun-maila bera mantentzeko.

e) Eskumenak eta eginkizunak erakunde-maila guztien artean zedarritzea, toki-araubidearen azken erreformen ondoriozko printzipioen arabera. Honako hauen ondorio da udalen esku-hartzea: hirigintza-diziplina, hiri-ingurumena, osasungarritasun publikoaren babesa edota udalek hiriko jabari publikoaren titular modura dituzten betebeharrak. Herritarrengana hurbiltzeko eta hainbat administrazioek jarduerak bikoiztea saihesteko ahalegina egiten du legeak.

Legeak ditu: 65 artikulua (bost titulutan bilduak), bi xedapen gehigarri, sei xedapen iragankor, xedapen indargabetzaile bat eta lau azken xedapen; horiez gain, eranskin bat ere badu, jendaurreko ikuskizunen, jolas-jardueren eta establezimendu publikoen katalogoa jasotzen duena.

Legearen I. tituluak xedapen orokorrak jasotzen ditu. Horretarako, ezartzen du zein den legearen xedea, zein haren aplikazio-eremua (arauaren zati artikulatuari datzekion katalogo batek zehazten du), zer gai geratzen diren haren eremutik kanpo, eta zer ikuskizun eta jolas-jarduera dauden debekatuta.

Era berean, Jendaurreko Ikuskizunen eta Jolas Jardueren Euskal Kontseilua arautzen du, administrazioen arteko lankidetzako eta parte-hartze publikoko organo modura.

II. tituluak arautzen du zer arau substantibok agindu behar duten ikuskizun publikoetan eta jolas-jardueretan. Hasteko, zerrenda batean jasotzen dira ikusle edo erabiltzaileen, antolatzaileen, artisten, interpretatzaileen, jotzaileen eta gainerako langileen eskubide eta betebeharrak. Gainera, beste hirugarren batzuen eskubideak ere jasotzen dira, haien interes legitimoak ukitzen direlako.

Era berean, arautzen da zer baldintza eta eskakizun bete behar dituzten ikuskizun eta jolas-jarduerak eta haiek burutzeko baliatzen diren establezimendu edo lekuek.

Ondoren, hainbat artikuluk zenbait alderdi lantzen dute eskaintzen diren zerbitzuen segurtasuna eta kalitatea eta zerbitzu horiek eskaintzen dituztenen erantzukizunak eta profesionaltasuna indartzeko, baita ikusleen eskubideak zaintzeko ere. Horrela, arautzen da: zer informazio eta publizitate eskaini behar zaien ikusleei edo erabiltzaileei establezimendu, ikuskizun eta jolas-jarduerari buruz; nola saldu sarrerak eta txartelak; zer betebeharrak dauden sarrera zaindu eta kontrolatzeko; zeintzuk diren onartzeko eta sarrera ukatzeko baldintzak; zer betebeharrak dagoen oinarritzko laguntzaren eta larrialdietako ebakuazioaren arloan, edo zer aseguru eskatzen diren. Era berean, neurri bereziak hartzen dira haurrak eta gazteak babesteko.

III. tituluak ezartzen du zein den establezimendu publikoak irekitzeko eta jendaurreko ikuskizun eta jolas-jarduerak egiteko araubidea.

Legeak sinplifikatu egiten du establezimendu publikoak irekitzeko arloko araudien arabera eska daitezkeen lizentzien egitura. Aurretik zegoen araudiak establezimendu-lizentzia berezi bat ezartzen zuen, eta, lizentzia hura lortzeko prozeduran, beste araudi batzuetan eska zitezkeen gainerako lizentzia edo gaikuntza-tituluak sartzen ziren; adibidez, jarduera sailkatuenak eta bestelako udal-lizentziak.

Barne-merkatuko zerbitzuei buruzko Europako araudiaren espirituari jarraituz, beharrezkotzat jotzen da arloko araudiek ez ugaritzea jarduera berbera egiteko gaikuntza-titulu desberdinak. Hori dela-eta, badirudi egokiagoa dela ikuskizun publikoetarako eta jolas-jardueretarako establezimenduak irekitzeko aurreikusitako araubidea bateratzea, jarduera sailkatuetarako aurreikusitako araubidean txertatuz. Horrek ez du eragotziko kontuan hartzea zer eskakizun eta baldintza azaltzen ziren ikuskizun eta jolas-jardueren berariazko araudi zaharrearantz gaikuntza-titulu horiek lortzeko.

Ondorioz, lege honek jarduera sailkatuen arautegira jotzen du bere eremuko establezimenduak irekitzeko; dena den, arau horiek elkarrekin egokiro lotzen direla bermatzeko, puntualki aldatu behar da Euskal Herriko ingurugiroa babesteko otsailaren 27ko 3/1998 Lege orokorra.

Udalei dagokie establezimendu publikoak ireki aurreko kontrol-lanak egitea. Hori gorabehera, jarduera sailkatuko lizentzia lortu aurretik, autonomia-erkidegoko ikuskizunen agintaritzek esku hartu ahal izango dute, txosten loteslearen bidez, legeak aurreikusten dituen kasuetan: jarduerak berak arrisku berezia eragiten duenean, edo 700 pertsonatik gorako edukierak arrisku berezia eragiten duenean.

Jarduera-lizentzia edo establezimendu baten jardueraren alde aurreko jakinarazpena aurkeztea titulu nahikoa da titulu horien babespean dauden ikuskizun eta jolas-jarduerak egiteko.

Titulu horien babespean ez dauden jendaurreko ikuskizunak edo jolas-jarduerak aldi behin egiteko, alde aurreko baimena edo alde aurreko jakinarazpena behar da lege honetan aurreikusitako kasuetan, eta alde aurreko baimena beharko da interes orokorreari eragiten zaien kasuetan. Udala izango da baimen hori emateko edo alde aurreko jakinarazpena jasotzeko eskumena duen organoa, edo, bestela, autonomia-erkidegoan ikuskizunen arloko eskumena duen agintaritzak, jardueraren eta aurreikusitako edukiera edo okupazioaren arabera.

Dena dela, autonomia-erkidegoak ikuskatu behar ditu zezen-ikuskizunak, zezenketak, protekniako ikuskizunak edo herriz kanpoko bideetako kirol-probak.

Leku publikoetan ospaizunak egiten direnean, udalak esku hartu behar du, jabari publikoaren erabilera pribatibo edo bereziaren gainean dauzkan eskudantziak erabiliz. Hala ere, autonomia-erkidegoak txosten loteslearen bidez esku hartzea aurreikusten da, leku publikoak 700 pertsonatik gorako edukiera- edo ahalmen-muga duenean jarduerak egiteko.

Bestalde, IV. titulua zaintzari, kontrolari eta ikuskaritzari buruzkoa da, eta hiru kapitulu jasotzen ditu: xedapen komunena, ikuskatzeko ahala gauzatzeari buruzkoa, eta segurtasun-neurriak hartzeari buruzkoa, hurrenez hurren. Establezimenduen titularren edo ikuskizun eta jarduerak antolatzen dituztenen betebeharra da jarduera hasteko aukera eman zuten baldintzak mantendu eta berrikustea, betiere administrazioaren ikuskatze- eta kontrol-ahalari kalterik egin gabe.

Jarduera hasi aurretik esku hartzeko ahalari atxikita daude kontrol- eta ikuskatze-ahal horiek, eta, hortaz, udalerrari edo autonomia-erkidegoko ikuskizunen agintaritzari dagozkio, egoeraren arabera. Hala ere, autonomia-erkidegoko ikuskizunen agintaritzak ikuskatze osagarria egin ahal izango du establezimendu, ikuskizun eta jolas-jardueretan, agintaritzak horrek egin behar badu udal-baimen edo -lizentzia emateko prozeduretako txostena; hau da, batez ere 700 pertsonatik gorako edukiera duten establezimendu, ikuskizun eta jolas-jardueretan.

Aipatutako osagarritasunari erreparatuz, administrazioen arteko lankidetzarako mekanismoak jartzea eta ikuskatze-plan partekatuak sustatzea aurreikusten da.

IV. titulua osatzeko, administrazio-poliziaren neurriak arautzen dira eta poliziaren zaintza berezia jartzeko aukera aurreikusten da, ikuskizunak edo jolas-jarduerak gauzatzen diren bitartean ikusleen edo erabiltzaileen segurtasuna babesteko; futbol-partidetan edo saskibalo-partidetan, esate baterako. Ondorio horietarako, tasa eta prezio publikoen legea aldatzea aurreikusten da.

V. tituluak legearen zehapen-araubidea jorratzen du. Lau kapitulu ditu: arau-hausteen sailkapena, zehapen-motak, preskripzio- eta iraungitze-araubidea eta eskumenak eta prozedura, hurrenez hurren. Legearen arabera, arau-hausteak dira: oso larriak, larriak eta arinak; betiere proportzionaltasun-irizpideen arabera. Gauza bera esan daiteke zehapenen zerrendari buruz. Zehapenei dagokienez, nabarmendu behar da, berria delako, ezen ikusle edo erabiltzaileek egiten dituzten arau-hauste arinen kasuan zehapena baldintzapean kentzeko aukera egongo dela, arau-hausleak berriro hezteko neurriak betetzea onartzen badu bere borondatez.

Dena dela, autonomia-erkidegoko organo eskudunek zehatzen dituzte arau-hauste oso larriak; gainerako arau-hausteei dagokienez, eskumena erkidegoarena edo udalarena izango da, kontrolatze- eta ikuskatze-eskumenen banaketaren arabera. Legeak zehatzen du ezen, espedienterik irekiz gero, elkarri jakinarazteko obligazioa dutela, eta arau-hauste eta zehapenen erregistro bat izan behar dela arauak aplikatzeko; esate baterako, baloratzeko berriro hausten den araua, edo zaintzeko ea betetzen diren desgaitze-zehapenak.

Azkenik, legeak xedapen gehigarriak, xedapen iragankorrak, xedapen indargabetzaileak eta azken xedapenak jasotzen ditu, eta eranskin bat aurreikusten du, jendaurreko ikuskizunen, jolas-jardueren eta establezimendu publikoen katalogoa jasotzen duena eta legearen aplikazio-eremua zehatzen duena.

## **I. TITULUA.- XEDAPEN OROKORRAK**

### **I. KAPITULUA.- ARAUAREN XEDEA, ESPARRUA ETA HELBURUAK.**

#### **1. artikulua.- Xedea.**

Lege honen xedea da: Euskal Autonomia Erkidegoan garatzen diren jendaurreko ikuskizunak eta jolas-jarduerak arautzea, eta ezartzea zein baldintza eta betekizun bete behar dituzten ikuskizun edo jarduerok eskaintzen dituzten leku irekiek eta establezimendu publikoek, berdin izanik haien titular edo antolatzaileak erakunde

publikoak edo pertsona fisikoak edo juridiko pribatuak diren, irabazteko asmorik duten ala ez, edo jarduera edo ikuskizunak etengabe edo aldi baterako antolatzen diren.

## **2. artikulua.- Definizioak.**

Lege honen ondorioetarako, definizio hauek ematen dira:

a) Jendaurreko ikuskizunak: arte, kultura, kirol edo antzekoekin zerikusia duen errepresentazio, erakusketa, jarduera, distrakzio edo proiektzioetan jendea biltzen duen gertakari oro, antolatzaileek eskaintzen dutena edo -antolatzaileek eskatuta- artista, kirolari nahiz jotzaileek eskaintzen dutena lokal itxi edo ireki batean nahiz aire zabaleko edota bide publikoko esparruren batean edota instalazio finko, eramangarri edo desmuntagarrietan.

b) Jolas-jarduerak: parte hartzeko asmoz edo antolatzaileek eskaintako zerbitzuak jasotzeko asmoz jendea biltzen duten jarduerak, aisiarekin, denbora-pasarekin edo dibertsioarekin lotuak, eta banaka edo beste jarduera batzuekin batera eskainiak.

c) Establezimendu publikoak: jendearentzat irekitako edozein eraikin, lokal, esparru edo instalazio, ikuskizunak eskaintzeko edo jolas-jarduerak egiteko erabiltzen dena.

d) Leku irekiak: titulartasun publiko edo pribatuko gune, toki edo bide publikoak, jendaurreko ikuskizunak edo jolas-jarduerak gauzatzeko erabiltzen direnak, baina horretarako ez dutenak ez azpiegiturarik, ez instalazio finkorik.

## **3. artikulua.- Aplikazio-eremua.**

1.- Lege honen eranskineko katalogoan jasotzen da zeintzuk diren lege honek arautzen dituen jendaurreko ikuskizunak, jolas-jarduerak eta establezimenduak. Eusko Jaurlaritzaren dekretuz, katalogo hori aldatu eta garatu ahal izango da, Jendaurreko Ikuskizunen eta Jolas Jardueren Euskal Kontseiluak txostena idatzi ondoren.

Lege honen eranskineko katalogoan jasotzen diren izen eta definizioak zaindu beharko dituzte lege hau oinarri hartuta etorkizunean ematen diren baimen eta alde zuzeneko jakinarazpenek.

2.- Lege honen aplikazio-eremutik kanpo geratuko dira ospakizun familiar eta sozial erabat pribatuak, jende guztiarentzat ez direnak; baita biltzeko eta manifestatzeko eskubidea gauzatzeko asmoz antolatutako jarduerak eta ospakizun erlijiosoak ere.

Dena den, ospakizun edo jarduera horiek ere bete beharko dute herritarren segurtasuna babesteko legeriak ezartzen duena, baita burutzen diren leku eta establezimenduei eskatzen zaizkien segurtasun- eta osasun-baldintzak ere, bat etorri lege honek eta berau garatuko duten erregelamenduek ezartzen dutenarekin eta aplikatu beharreko araudi bereziarekin.

3.- Kasuan kasuko legeriak aurreikusten ez duen guztirako, lege hau beste batzuen osagarri modura aplikatu beharko da era guztietako jendaurreko ikuskizunetan, jolas-jardueretan eta establezimendu publikoetan.

#### **4. artikulua.- Helburuak.**

1.- Lege honen helburua da: jendaurreko ikuskizun eta jolas-jarduerak egokiro garatzen laguntzea, parte-hartzaileak edo ikusleak arriskuan jarri gabe, herritarren bizikidetzak bermatuz, eta segurtasuna eta ordena publikoa hautsi gabe.

2.- Lege hau garatu eta aplikatzeko orduan, honako printzipio gidari hauek zaindu beharko dituzte administrazio publikoek eta ikuskizun eta jolas-jardueren antolatzaileek:

a) Ikuskizun eta jolas-jardueretako ikusle, partaide eta erabiltzaileen bizikidetzak baketsua eta ordenatua.

b) Jarduera horiek egiten diren lekuetatik gertu bizi diren pertsonen eskubideak errespetatzea.

c) Establezimendu publikoetako, jendaurreko ikuskizunetako edo jolas-jardueretako ikusle, erabiltzaile edo langileen segurtasuna eta osasuna.

d) Ekipamenduen, jendaurreko ikuskizunen eta jolas-jardueren kalitatea, erosotasuna eta ingurumen-jasangarritasuna.

e) Bermatzea betetzen direla irisgarritasunari, gizon eta emakumeen berdintasunari eta hizkuntza-eskubideei buruzko araudian jasotzen diren lege-betebeharrak.

#### **5. artikulua.- Debekuak.**

1.- Debekaturik daude ikuskizun edo jolas-jarduera hauek:

a) Delitu izan daitezkeenak.

b) Indarkeria, arrazakeria, xenofobia, sexismoa edo beste edozein bereizkeria-mota sustatzen dutenak eta gizakiaren duintasunaren aurkakoak.

c) Haurrak eta nerabeak babestearen aurkakoak.

d) Animaliak babesteko araudia betetzen ez dutenak.

e) Euskadiko kultura- edo natura-ondareko ondasunetan egiten direnak, ondasunen babes-araubidea hautsiz, edo ondasunon osotasuna bermatu gabe.

f) Kanean edo leku publikoetan, pertsona-taldeek ostalaritzako lokaletakoak ez diren edariak kontsumitzea; biltzearen edo kontsumitzearen ondorioz eta horri buruz gara daitezkeen udal-araudiaren arabera, eragozpenak eragitea leku publikoa darabilten pertsonen edota auzotarrei, edota ingurunearen lasaitasuna hondatzea, edo osasungaiztasuneko egoerak eragitea.

2.- Agintaritzak eskudunak establezimendu, toki, lokal edo instalazioak itxiko ditu jendaurreko ikuskizun edo jolas-jarduera debekaturik eskaini edo burutzen badute.

## **II. KAPITULUA.- JENDAURREKO IKUSKIZUNEN ETA JOLAS JARDUEREN EUSKAL KONTSEILUA.**



## **6. artikulua.- Jendaurreko Ikuskizunen eta Jolas Jardueren Euskal Kontseilua.**

1.- Jendaurreko Ikuskizunen eta Jolas Jardueren Euskal Kontseilua da aholku-organo bat, azterlanak egin, eta EAeko administrazio publikoei lege honetan araututako gaien inguruko aholkuak ematen dizkiena, eta administrazioak eurak koordinatzen dituen. Eusko Jaurlaritzan ikuskizun-arloko eskumenak dituen sailari dago atxikita.

2.- Kontseiluak eskumen hauek ditu:

a) Txostenak ematea ikuskizun publikoen eta jolas-jarduerei buruz ematen diren xedapen orokorren proiektuei buruz.

b) Euskadiko administrazio publikoek ikuskizun eta jolas-jardueren arloan izan behar duten jarduna koordinatzea.

c) Kontseiluan ordezkariak duten erakundeek eta bestelakoek eskatuta, lege honen aplikazio-eremuko gai buruzko irizpenak eta txostenak ematea, galderei erantzutea, eta aholkularitza eskaintzea.

d) Azterlanak eta proposamenak egitea lege honetan ezartzen diren helburuak hobeto lortzeko.

e) Irizpideak eta helburuak proposatzea establezimenduak, ikuskizunak eta jolas-jarduerak ikuskatzeko plan eta programak egiteko.

f) Eusko Jaurlaritzan ikuskizunen arloko eskumenak dituen zuzendaritzak sektorearen egoerari eta bilakaerari buruz urtero idatziko duen txostenaz eztabaidatzea, eta, hala dagokionean, hura onartzea.

g) Erregelamendu bidez ematen zaizkion eskumen guztiak.

3.- Hona Jendaurreko Ikuskizunen eta Jolas Jardueren Euskal Kontseiluaren osaera:

a) Lehendakaria: Eusko Jaurlaritzan ikuskizunen eskumena duen saileko sailburuorde bat.

b) Lehendakariordea: Eusko Jaurlaritzan ikuskizunen eskumena duen zuzendaria.

c) Segurtasun-arloko eskumena duen saileko ordezkariak: bi. Saileko titularrak izendatuko ditu, eta erantzukizuna izan beharko dute poliziako eta larrialdietako arloan eta babes zibilean.

d) Eusko Jaurlaritzan industria, hezkuntza, turismo, kultura, kirol eta osasun arloko eskumenak dituzten sailtako ordezkariak: sei.

e) Lurralde historikoetako ordezkariak: bat hiriburuko.

f) Euskal Autonomia Erkidegoko udaletako ordezkariak: bi, ordezkariak handiena duten udalek izendatuak.

g) Eragindako sektore ekonomikoa ordezkariak duten erakundeek eta kontsumitzaileak defendatzeko elkarten ordezkariak: gehienez ere, bost kide. Ikuskizunen eskumena duen saileko titularrak izendatuko ditu sektore bakoitzean ordezkariak handiena duten erakundeetatik.

h) Ikuskizunen eskumenak dituen zuzendaritzako funtzionario bat arduratuko da Kontseiluko idazkaritza-lanez: hitza izango du, baina botorik ez.

Jendaurreko ikuskizunen eta Jolas Jardueren Euskal Kontseilua osatzean, genero-ekitateko irizpideak zaindu beharko dira kideak izendatzeko, kideok karguagatik izendatzen ez direnean. Nolanahi ere, ahaleginak egin beharko dira genero-prestakuntzan adituak diren pertsonak egon daitezen.

## **II. TITULUA.- IKUSKIZUN ETA JOLAS-JARDUEREI APLIKATU BEHARREKO ARAUBIDEA.**

### **I. KAPITULUA.- ESKUBIDEAK ETA BETEBEHARRAK.**

#### **7. artikulua.- Ikusle eta erabiltzaileen eskubideak.**

Kontsumitzaile eta erabiltzaileak defendatzeko araudiak aitortzen dizkien eskubideez gainera, honako eskubide hauek izango dituzte ikuskizunen eta jolas-jardueren ikusleek eta erabiltzaileek nahiz establezimendu publikoetako bezeroek:

a) Establezimendura edo jendearentzat irekitako lekura sartzeko eskubidea, bertara doazen pertsona guztien baldintza objektibo beretan. Dena den, gerta liteke ezin sartzea edukieragatik edo sarrera ukatzeko beste arrazoiren batengatik, dela erregelamenduz zehaztuta dagoelako, dela zerikusia duelako segurtasunarekin, onartzeko baldintza objektiboekin eta ordena publikoa ez nahastearekin.

b) Ikuskizuna ikusteko eskubidea edo jolas-jardueran parte hartzekoa; horiek guztiak, gainera, osorik eta enpresak iragarritako moduan eta baldintzetan jasotzeko eskubidea.

c) Zerbitzu orokorrak erabiltzeko eskubidea, enpresak jarraibideetan eta arau partikularretan ezarritako moduan eta muga berekin.

d) Iragarritako ikuskizuna edo jolas-jarduera aldatu edo bertan behera geratuz gero, ordaindutako kopuruak berreskuratzeko eskubidea, kalterik egin gabe ikuskizun edo jolas-jarduera bakoitzari aplikatu beharreko araudian aurreikusitakoari.

e) Enpresak erreklamazio-orriak emateko eskubidea, egoki iritzitako erreklamazioak jasotzeko orri horietan.

f) Errespetuzko tratua jasotzeko eskubidea: ez arbitrarioa, ez diskriminatzailea.

g) Ikuskizun eta jolas-jarduerari buruz egiten den publizitatea egiazkotasun- eta nahikotasun-printzipioen arabera izateko eskubidea, eta publizitate horrek okerreko iritzirik edo iruzurra eragin dezakeen informaziorik ez izateko eskubidea.

#### **8. artikulua.- Ikusle eta erabiltzaileen betebeharrak.**

Honako betebeharrak hauek izango dituzte ikuskizun eta jolas-jardueren ikusleek edo ekitaldi horietara joaten direnek eta establezimendu publikoetako bezeroek:

- a) Antolatzaileak jendea sartzeko eta onartzeko ezartzen dituen baldintza orokorrak betetzea, betiere legeak finkatutako mugen barruan.
- b) Dagokien tokia hartzea, edo, kasu bakoitzean, ikusle, bezero edo erabiltzaileentzat adierazten diren guneetan egotea; ez sartzeko beste xede batzuetako guneetan, eta ez oztopatzea ebakuazio-bide edo -ibilbideak.
- c) Enpresak ikuskizuna edo jarduera garatzeko ezartzen dituen jarraibide edo arau partikularrak betetzea.
- d) Iragarritako programa, ikuskizun edo jarduera bere horretan errespetatzea, eta aldaketarik ez exijitzea.
- e) Ez sartzeko agertokira edo ikuskizun edo artista edo jotzaileen eremura, salbu ikuskizunean aurreikusita dagoenean parte hartzeko aukera egongo dela.
- f) Errespetatzea ikuskizun eta jolas-jardueretako establezimenduetan ez erretzeko debekua, horri buruz indarrean den araudian aurreikusitako baldintzetan.
- g) Saihestea gainontzeko ikusleentzat edo enpresako langileentzat arriskutsua edo deserosoa izan daitekeen ezer egitea, edo ikuskizun edo jarduera burutzea eragoz dezakeen ezer egitea.
- h) Ez eramatea inolako armarik edota indarkeria eragiteko erabil daitekeen bestelako objekturik; ez erakustea oinarrizko eskubideen kontrako ekintzarik sustatzen duen sinbolo, jantzi edo gauzarik eta, bereziki, indarkeria, xenofobia edo bazterkeria sustatzen duen ezer.
- i) Errespetatzea jendearentzat irekitako establezimenduetan, jendaurreko ikuskizunetan nahiz jolas-jardueretan diharduten langile, artista, interpretatzaile edo jotzaileak nahiz gainerako langileak.
- j) Errespetatzea ikuskizuna edo jarduera hasi eta amaitzeko orduak.
- k) Establezimenduan sartzean edo bertatik irtetean, gizalegez jokatzeko, herritarren elkarbizitza bermatzeko; ikuskizuna edo jarduera izango den inguruetan, ez eragozteko auzokoen deskantsua, eta ez kaltetzea hiri-tresneria.

## **9. artikulua.- Beste interesdun batzuen eskubideak.**

1.- Inork bere eskubide eta berezko interesak kalteturik ikusten baditu ikuskizun eta jolas-jardueren ondorioz edota jendearentzat irekitako establezimenduen funtzionamenduaren ondorioz, honako eskubide hauek izango ditu:

- a) Lege honetan aipatzen diren lizentziak edo baimenak emateko prozeduretan interesdun gisa agertzeko eskubidea.
- b) Establezimenduek edo jendearentzat irekita dauden lekuek sortzen dituzten eta auzokideen elkarbizitzari eta deskantsuari eragiten dioten eragozpenak salatzeko eskubidea. Kasu horietan, eskumena duten agintaritzek eskubidea izango dute erabili beharreko baliabide teknikoak erabiltzeko, eta egiaztatzeke ea salatutako eragozpen horiek benetakoak diren ala ez, eta lortutako emaitzen arabera jarduteko, halakorik berriro gerta ez dadin.

2.- Etxebizitzaren baten barruan entzuten diren zaratek eraginez gero aurreko paragrafoan aipatzen diren salaketak, salatzaileek baimena eman beharko diete administrazioko ikuskatzaile eta teknikariei etxe barruan sartzeko, etxera sartu behar bada espedientea irekitzeko. Sartzeko baimenik eman ezean, jardunbideak artxibatuko dira.

#### **10. artikulua.- Titular eta antolatzaileen eskubideak.**

Enpresa-askatasunaren eskubidearen esparruan, honako eskubide hauek dituzte titularrek eta antolatzaileek:

- a) Jendaurreko ikuskizuna edo jolas-jarduera egiteko, aplikatu beharreko araudian aurreikusitakoaren arabera, eta, hala badagokio, baimenaren edo aldez aurreko jakinarazpenaren arabera.
- b) Egoki irizitako neurriak hartzeko, jendearentzat irekitako establezimenduak, ikuskizunak edo jarduerak segurtasunez eta kalitatez funtzionatuko duela bermatzeko.
- c) Prezio egokiak jartzeko.

#### **11. artikulua.- Titular eta antolatzaileen betebeharrak.**

1.- Titular eta antolatzaileek beren gain hartuko dute ikuskizuna edo jarduera burutzearen ondoriozko erantzukizuna, eta kalteengatik erantzun beharko dute beren zabarkeria edo aurreikuspen faltagatik ezer gertatuz gero.

2.- Aurreko paragrafoan ezartzen den agindua hobeto betetzeko, honako betebeharrak hauek izango ditu titular edo antolatzaileak:

- a) Segurtasun- eta osasungarritasun-arloko neurri guztiak hartzea, baita zaratak neurtzeko oro har ezartzen direnak edo dagokien lizentzia edo baimenetan berariaz ezartzen direnak ere.
- b) Jendaurreko ikuskizunik edo jolas-jarduerarik eginez gero, saihestea eragozpenik sortzea edo zaratarik egitea establezimendu publikoetatik kanpo edo horien instalazio osagarrietatik kanpo.
- c) Funtzionatzeko egoera ezin hobean mantentzea beti establezimendu eta instalazioak, eta indarrean den araudiaren arabera egin beharreko egiaztapenak egitea.
- d) Agintaritza eskudunek erabakitako ikuskapen-lanak egiten uztea, eta lanok egiten laguntzea.
- e) Ikuskatze-zerbitzuei eskuratzea establezimenduaren titulartasunari buruzko gaikuntza-agiri guztiak.
- f) Jendeari iragarritako ikuskizun eta jolas-jarduerak bere horretan mantentzea eta eskaintzea, salbu halabeharrez edo ustekabez ezinezkoa den kasuetan. Dena den, ikuskizun edo jolas-jarduera bakoitzean aplikatu beharreko araudiak aurreikusten duena bete beharko da.

- g) Jendeari sartzen uztea, salbu legez edo erregelamenduz zehazten diren kasuetan.
- h) Bertaratzen direnak errespetuz eta begirunez hartzea.
- i) Ez baimentzea legez kanpoko jarduerarik, batez ere droga-kontsumoarekin eta -trafikoarekin zerikusia duenik.
- j) Ez onartzea lege honek aurreikusitako arau-hausterik egitea, ez ikuskizun edo jardueran parte hartzen dutenei, ez menpean dituztenei, ezta ikusle edo erabiltzaileei ere.
- k) Autobabeserako neurriak eta lokala bera eta bertako jendea ebakutzeko neurriak hartu eta aplikatzea, indarrean den arautegiak ezartzen dizkien eginkizun eta erantzukizunez baliatuz.
- l) Aplikatu beharreko araudian jasotzen den moduan erantzutea dena delako ikuskizuna edo jolas-jarduera antolatu eta burutzearen ondorioz sortutako kalte-galerengatik.
- m) Lizentzia eta baimen edo bestelako gaikuntza-tituluen titularren identitatea eta helbidea aldatuz gero, horren berri ematea administrazio eskudunei erregelamendu bidez ezartzen den epean.
- n) Irisgarritasun unibertsalari buruz indarrean dagoen araudian aurreikusitako baldintzetara egokitzea establezimendu publiko, ikuskizun eta jolas-jarduerak.
- ñ) Errespetatzea gizon eta emakumeen berdintasunari buruzko araudian aurreikusten diren betebeharrak.
- o) Erreklamazio-orriak jartzea erabiltzaileen esku, erregelamendu bidez ezartzen diren betekizunekin.
- p) Betetzea kontsumitzaile eta erabiltzaileen hizkuntza-eskubideei buruzko araudian ezarritako betebeharrak.
- q) Lege honek eta arlo honetan aplikatu beharreko gainerako araudiak ezartzen dituen betebeharrak guztiak betetzea.

## **12. artikulua.- Artista, interpretatzaile eta jotzaileen eta gainerako langileen eskubideak.**

Eskubide hauek dituzte jendearentzat irekitako establezimenduetan lan egin edo jendaurreko ikuskizunetan nahiz jolas-jardueretan diharduten artista, interpretatzaile edo jotzaileek eta gainerako langileek:

- a) Kontrataturako ikuskizun edo jarduera aurrera eramateko eskubidea, bat etorritako kasu bakoitzean arautzen duten arauarekin eta artista edo antolatzaileekin hitzartutako programa edo gidoiarekin.
- b) Bidezko arrazoiengatik edo ezinbesteko arrazoiengatik, emanaldian parte hartzeari uko egiteko edo emanaldia aldatzeko eskubidea. Kasu guztietan, bidezko arrazoi izango da segurtasun- edo higiene-baldintzak ez betetzea, edo behar bestekoak ez izatea. Artista, interpretatzaile edo jotzaileek horien egoera egiaztatu ahal izango dute ikuskizuna edo jolas-jarduera hasi aurretik.

c) Titular, antolatzaile, ikusle eta erabiltzaileengandik errespetuzko tratua jasotzeko eskubidea.

d) Ikuskizuna edo jolas-jarduera gauzatzeko behar den babesa jasotzeko eskubidea, baita establezimendura edo jendearentzat irekitako lekura sartzeko eta bertatik irteteko eskubidea ere.

### **13. artikulua.- Artista, interpretzaile, jotzaile eta gainerako langileen betebeharrak.**

Betebehar hauek izango dituzte jendearentzat irekitako establezimenduetan lan egin edo jendaurreko ikuskizunetan nahiz jolas-jardueretan diharduten artista, interpretzaile edo jotzaileek eta gainerako langileek:

a) Bertaratuak errespetatzea.

b) Kontratutako jarduera edo ekitaldia burutzeko betebeharra, aurreko artikuluko a) idatzi-zatian ezarritako baldintzen arabera.

## **II. KAPITULUA.- IKUSKIZUNEK ETA LOKALEK BETE BEHARREKO ESKAKIZUNAK ETA BALDINTZAK.**

### **14. artikulua.- Baldintza teknikoak.**

1.- Pertsonen eta haien ondasunen segurtasuna bermatzeko eta bertarutzen direnei eta hirugarrenei eragozpenik ez sortzeko, jendaurreko ikuskizunek, jolas-jarduerak eta horiek egiten diren establezimendu edo leku publikoek bete behar dituzte, bai segurtasun-, osasungarritasun- eta higiene-baldintzak, bai irisgarritasun unibertsaleko baldintzak, baita arlo horretan aplikatu beharreko araudiak exijitzen dituenak ere.

2.- Baldintza horien artean sartzen dira, besteak beste, lege honek eta berau garatzeko erregelamenduek eta aplikatu beharreko gainerako ordenamenduek honako gai hauei buruz ezartzen dituzten eskakizunak:

a) Bertaratu, langile eta artisten segurtasuna eta ondasunen babesa.

b) Egituren sendotasuna eta instalazioen funtzionamendu egokia.

c) Instalazio elektrikoaren baldintzak eta bermeak.

d) Suteak eta jardueraren beraren gainerako arriskuak aurreikustea eta saihestea, eta kanpoko laguntzaren irisgarritasuna erraztea.

e) Osasungarritasun- eta higiene-baldintzak eta baldintza akustikoak, berariaz zehaztuta zer intsonorizazio-baldintza bete behar duten lokalek eragozpenik ez sortzeko hirugarrenei; betiere zaratei buruzko legerian ezarritakoaren arabera.

f) Hiri eta naturako ingurunea eta historia-, arte- eta kultura-ondarea babestea.

g) Irisgarritasun unibertsaleko baldintzak eta gozamen-baldintzak, mugikortasun murriztua duten pertsonentzat. Baldintza horiek bat etorri behar dute irisgarritasunari

eta arkitektura-oztopoak kentzeari buruzko araudian ezarritakoarekin, eta ikuskizunaz benetan gozaten lagundu behar diete pertsona horiei.

h) Indarrean dauden autobabes-arauden arabera autobabes-plana.

i) Establezimendu, lokal edo instalazioaren ahalmena eta edukiera.

j) Indarrean dagoen edo aplikatu behar den araudian ezartzen diren beste guztiak.

3.- Ingurumena eta hiri-ingurunea babesteko edo historia- eta arte-ondarea zaintzeko, udalek debeku, muga edo murrizketak ezarri ditzakete, ordenantza edo erregelamendu bidez, bermatzeko ez dagoela establezimendu publiko eta jolas-jarduera gehiegi batera, edo beste giza edo gizarte-jarduera batzuekin batera egin daitezkeela.

4.- Erregelamenduz, Eusko Jaularitzak arautu ahal izango du noiz eta zer ezaugarri eta baldintzarekin egon daitezkeen, ordutegi berezia edukitzeagatik, jendearentzat irekitako establezimendu araubide berezikoak; adibidez, irizpide hauek arautu ahal izango ditu: kokalekua, gutxieneko distantziak, neurri bereziak edo mugikortasun-zerbitzuak, egoitzaguneetan eta gizarte- eta kultura-jardueretan duten eragina murrizten dutenak, eta eragindako pertsonen segurtasuna eta osasuna aurreikustekoak.

## **15. artikulua.- Informazioa eta publizitatea.**

1.- Lege honen aplikazio-eremuko establezimendu publikoetara sartzeko, kartel edo plaka bat jarri behar da establezimenduaren jarduera eta titulartasuna identifikatzeko; kartel edo plaka hori toki ageri batean eta irakurtzeko moduan jarri beharko da, onartzen den eredu normalizatuaren arabera.

Kartel edo plaka horretan, establezimenduaren izena jasoko da, eta, gutxienez, honako hauek jasoko dira Euskal Autonomia Erkidegoko hizkuntza ofizial bietan: zer jarduera edo ikuskizun sartzen diren lizentzia, baimen edo alde aurreko jakinarazpenaren barruan, zein den ordutegia, zein den baimendutako gehieneko edukiera, eta adingabeek zer egoeratan duten debekatuta sartzea.

Era berean, ostalaritzako eta jendaurreko ikuskizunetako lokalek identifikazio-bereizgarriak jarri beharko dituzte, eta adierazi zein taldeetakoak diren, bakoitzak garatzen duen jardueraren arabera.

2.- Aurreko paragrafoan xedatutakoa gorabehera, ikuskizuna edo jolas-jarduera antolatzen duenak informazio hau jarri behar du jendearentzat agerian dagoen toki batean, eta ondo irakurtzeko moduan:

a) Gaikuntza-agiriaren kopia: lizentzia, baimena edo aurkeztutako alde aurreko jakinarazpena, kasuaren arabera.

b) Telefono-zenbakia, posta-helbidea, fax-zenbakia edo posta elektronikoko helbidea edo, baldin badu, webgunea, erreklamazioak aurkeztu edo informazioa eskatu ahal izateko.

c) Erreklamazio-orriak daudela.

d) Irekitzeko eta ixteko orduak.

e) Gehienez ere baimentzen den edukiera.

f) Onartzeko baldintzak, sartzeko mugak barne, halakorik badago.

g) Ikuskizuna edo jarduera behar bezala garatzeko bete beharreko arau partikularrak edo jarraibideak, halakorik badago.

3.- Jendaurreko ikuskizunen eta jolas-jardueren berri ematen duten iragarki, kartel eta programek informazio hau eman behar dute gutxienez:

a) Zer izen, helbide, telefono eta posta elektronikoa daukan jendaurreko ikuskizuna edo jolas-jarduera antolatzen duenak.

b) Zein motatakoa den jendaurreko ikuskizuna edo jolas-jarduera, eta nortzuk diren artista nagusiak.

c) Zein egunetan eta lekutan izango den jendaurreko ikuskizuna edo jolas-jarduera; zein den haren ibilbidea -hala badagokio-, ordutegia eta gutxi gorabeherako iraupena.

d) Zeintzuk diren onartzeko baldintzak; zer bidetatik edo saltokitan erosi ahal diren sarrerak, eta zer prezio daukaten, zergak barne, hala badagokio.

e) Hala badagokio, jendaurreko ikuskizunaren edo jolas-jardueraren sailkapena: adinaren arabera.

4.- Eusko Jaurlaritzan ikuskizunen eskumena duen sailak eredu normalizatuak argitaratu ahal izango ditu aurreko paragrafoan jasotako informazio- eta publizitate-obligazioak betetzeko.

5.- Jardueren kartelak, iragarkiak eta programak edozein bitartekoz inprimatu, banatu edo zabaltzen dituzten enpresek administrazio publiko eskudunei lagundu beharko diete identifikatzen nork antolatu dituen iragarritako ikuskizun edo jarduerak.

## **16. artikulua.- Sarrerak eta txartelak saltzea.**

1.- Baldintza hauetan salduko dira sarrera, txartel eta abonamenduak:

a) Antolatzaileek identifikatu behar dute zein bidetatik eta non eros daitezkeen jendeari zuzenean saltzen zaizkion sarrerak.

b) Jendeari zuzenean saltzeko moduan jarri beharko dute edukieraren ehuneko bat, arauz ezarriko dena.

c) Sarrerak edo abonamenduak ezin izango dira saldu publizitatean iragarri baino garestiago.

Hala ere, kasuaren arabera, lizentzia eman edo alde aurreko jakinarazpena jaso edo baimendu behar duen organoak baimena eman ahal izango du sarrerak edo abonamenduak komisioaz saltzeko.

d) Debekatuta dago sarrerak eta abonamenduak errekariguz birsaltzea, baimenik gabe komisioaz saltzea, edota ezkutuan saltzea. Horrelakoetan, kautelazko neurri modura, berehala kendu ahal izango dira sarrera edo abonamenduak, eta zehapen-prozedura ireki ahal izango da.

e) Abonamenduen salmentari buruz, komisioidun salmentaren eta sarreren salmenta telematikoari buruz eta arau berezia behar dutenei buruz Eusko Jaurlaritzak erregelamenduz ezartzen dituen baldintza guztiak.



2.- Jendurreko ikuskizunen eta jolas-jardueren antolatzaileek egiten dituzten sarrerek informazio hau izango dute, gutxienez:

- a) Hurrenkera-zenbakia.
- b) Antolatzailearen izena eta helbidea.
- c) Ikuskizuna edo jarduera.
- d) Tokia, eguna, hasiera-ordua eta amaitzeko gutxi gorabeherako ordua.
- e) Eserleku-mota eta -zenbakia, eserleku zenbakituko saioetan.
- f) Prezioa.
- g) Itzultzeko baldintzak.
- l) Erregelamendu bidez ezarritako beste edozein.

## **17. artikulua.- Ordutegia.**

1.- Iragarritako moduan hasi eta burutu behar dira jendurreko ikuskizunak eta jolas-jarduerak, eta kartel, programa edo iragarkietan aurreikusitako denboran; salbu eta ustekabeko arrazoiek horiek aldatzea justifikatzen badute, eta aldaketok behar besteko aurrerapenarekin jakinarazten bazaizkio jendeari.

2.- Erregelamendu bidez, Eusko Jaurlaritzak ezarriko du zein den establezimendu publikoen ordutegi orokorra, besteak beste kontuan hartuz nolakoa den establezimendua, ikuskizuna edo jolas-jarduera eta zer urtaro edo urte-saso den, eta hark ezarriko ditu ordutegiaren luzapenak edo murrizketak ere.

3.- Jai-egunetan edo bestelako jardunaldietan, udalek inoiz luzatu ahal izango dute establezimenduen ordutegi orokorra, arau bidez aurreikusitako egoeretan eta moduetan.

4.- Establezimendu, ikuskizun edo jolas-jardueraren ezaugarriak direla-eta justifikatuta dagoenean ordutegi berezia jartzea, Eusko Jaurlaritzan jendurreko ikuskizunen arloko eskumena duen sailak baimena eman ahal izango du ordutegi orokorra zabaltzeko. Horrelakoetan ordutegi berezia jarri ahal izateko, baldintzak jarri ahal izango dira auzokoei eragozpenik ez sortzeko neurri zuzentzaile gehigarriak betetzeko.

Baimen horiek, berriz, ez dute etorkizunerako eskubiderik sortzen edo aitortzen; beti bete beharko dira baimenok emateko ezarritako eskakizunak.

5.- Establezimendu publikoak, ikuskizunak edo jolas-jarduerak baimentzeko eskumena duten administrazioek edo aldez aurreko jakinarazpena jasotzeko eskumena dutenek, bestalde, modu berezian mugatu ahal izango dute ordutegi orokorra, baldin eta ordutegi berezia jartzea justifikatzen badute ikuskizun edo jardueraren ezaugarriek eta horien tokitik ospitale edo haur edo adinduentzako egoitza-ekipamenduetara dagoen distantziak.

6.- Agindu honetan ordutegiei buruz xedatutakoa gorabehera, bete egin beharko dira ingurumen-kutsadurari eta kutsadura akustikoari buruzko lege-xedapenek ezarritako mugak.

## 18. artikulua.- Adingabeak babestea.

1.- Haurrak eta nerabeak babesteko, mugak ezartzen dira adingabeak jendurreko ikuskizunetan, jolas-jardueretan eta establezimendu publikoetan sartzeko eta haietan egoteko.

2.- Adingabeak ezin izango dira establezimenduetan sartu edo egon, baldin eta adingabeentzat desegokitzat jotako jarduerarik edo erakusketarik egiten bada establezimenduetan, edo adingabeentzat material edo informazio desegokia zabaltzen bada edozein bitartekoz. Bereziki debekatuta dago:

a) Hemezortzi urtetik beherakoak sartzea edo egotea lege honetako katalogoan azaltzen diren erakusketa-areto berezietan, baldin eta proiektzioak, erakusketak edo zuzeneko emanaldiak pornografikoak badira, muturreko biolentzia erakusten badute, edo, edukiari erreparatuta, adin nagusikoentzat badira.

b) Adingabeak joko-establezimenduetan eta -lokaletan sartzea eta egotea; betiere, berariazko araudiaren arabera.

c) Adingabeak dantzalekuetan, dantza-aretoetan eta diskoteketan sartzea eta egotea, kalterik eragin gabe adingabeentzako saioak egiteko baimena duten dantza-areto edo diskotekei buruz edota gazte-aretoei buruz xedatutakoari.

d) Hamasei urtetik beherakoak taberna berezietan, pub eta disko-tabernetan sartzea eta egotea, salbu adin nagusikoekin daudenean alkoholik kontsumitu barik eta 22:00ak arte.

3.- Antolatzaileek adinaren arabera sailkatu eta mailakatu beharko dute sarbidea, erregelamenduz ezartzen den moduan, baldin eta antolatzen dituzten jendurreko ikuskizunak edo jolas jarduerak arriskutsuak izan badaitezke adingabeen nortasuna garatzeko edo haiek prestatzeko. Sailkapen hori, berriz, ondo ikusteko moduan azaldu beharko da kanpoko karteletan, publizitatean eta sarreretan.

4.- Establezimendu eta instalazioek bezeroei Interneteko sarbidea eskainiz gero, edukiak murriztu, eta kautelak ezarri beharko dituzte adingabeak sartu ez daitezen nortasunaren garapenean eta prestakuntzan kalte egin diezaietkeen informazioan. Edonola ere, debekatuta dago adingabeak ziberkafetegietan sartzea, baldin eta Interneteko informatika-sareetako konexioek ez badiote erabiltzaileen adinari inolako mugarik jartzen.

5.- Dantzaleku edo diskotekek adingabeentzako saioak prestatu ditzakete, zeinetan onartuko baita hamalau eta hamazortzi urte bitarteko gazteak sartzea eta bertan egotea. Horretarako, gutxienez, baldintza hauek bete beharko dituzte:

a) Adingabeentzako saioei buruz establezimendu horiek egiten duten publizitateak ez du adingabeentzako erreferentzia edo mezu desegokirik eduki edo aipatuko, ez zuzenean, ez zeharka.

b) Debekatuta dago edari alkoholodunik edo tabakorik ematea edo saltzea.

c) Establezimendu publiko horiek irekita daudenean, ezin da ustiatu zorizko jolas-makinarik edo -sistematik.

d) Establezimendua ezin izango da itxi erregelamenduz ezarritako ordua baino beranduago. Dena den, ordubete pasatu eta gero, lokala berriro ireki ahal izango da, baina ez zaie hemezortzi urtetik beherakoei sartzen utziko.

e) Ezin izango da ikuskizunik egin, apaingarririk jarri edo propagandarik egin adingabeen osotasun fisiko, psikiko edo morala arriskuan jartzen badute.

6.- Bertaratzen den jendearen adina egiaztatzeko, nortasun-agiri nazionala edo agiri horren baliokidea erakusteko eska dezakete establezimendu publikoen edo instalazioen titularrek eta jendaurreko ikuskizunen edo jolas-jardueren antolatzaileek, zuzenean edo beren zerbitzura dauzkaten langileen bitartez. Ez diete sartzeko utziko adina dokumentu bidez egiaztatzen ez dutenei edo, lege honetan ezarritakoaren ondorioetarako, adinaren eskakizuna betetzen ez dutenei; barruan egonez gero, irtenaraziko dituzte, zuzenean edo beren zerbitzura dauzkaten langileen bitartez.

7.- Adingabeei ezin izango zaie edari alkoholduunik edo tabakorik saldu edo eman jendaurreko ikuskizunak edo jolas-jarduerak antolatzen dituzten establezimenduetan edo instalazioetan sartzeko direnean, eta gai horiei buruz indarrean dagoen legeria beteko da.

## **19. artikulua.- Sarrera zaintzeko eta kontrolatzeko betebeharrak.**

1.- Euskadiko segurtasun publikoko sistema arautzen duen ekainaren 28ko 15/2012 Legean eta lege honetan xedatutakoa garatzeko, erregelamenduz zehaztuko da zer ikuskizun, jarduera eta establezimendu publiko motek izan behar dituzten, beren izaera edo edukieragatik edo herritarren bizikidetzan izan dezaketen eraginagatik, ondoren azaltzen direnak:

a) Segurtasun-neurri bereziak; behar izanez gero, arma edo bestelako objektu arriskutsuak antzemateko gailuak ere bai.

b) Segurtasun pribatuko zerbitzuak, segurtasun pribatuari buruzko legerian ezarritako baldintza eta eskakizunekin.

c) Jendea onartzeko zerbitzu bereziak, langileak egokiro identifikatu eta akreditatuta dituztenak, bezero edo erabiltzaileen sarrera kontrolatzeko.

2.- Eusko Jaurlaritzak erregelamenduz zehazten dituen baldintza eta ezaugarrien arabera pertsonak kontatu eta edukiera kontrolatzeko sistemak eduki beharko dituzte 700 pertsonatik gorako edukiera onartuta duten establezimendu publikoek edo instalazioek. Udal-agintaritzak zehaztuz gero, edukiera txikiagoa dutenek ere eduki beharko dituzte sistema horiek.

## **20. artikulua.- Jendea onartzeko baldintzak.**

1.- Lege honen ondorioetarako, sarrera ukatzeko eskubidea da: establezimendu publikoen titularrek edo ikuskizun eta jolas-jardueren antolatzaileek duten ahalmena jendea onartzeko eta bertan mantentzeko baldintza objektiboak ezartzeko.

2.- Baldintza horiek edo sarrera ukatzeko eskubideaz baliatzea, ostera, ez dira aitzakia izango bereizketarik egiteko erabiltzaileen jatorri edo jaioleku, arraza, sexu, erlijio, iritzi, desgaitasun, sexu-orientazio edo genero-identitatea dela-eta edo erabiltzaileen egoera edo inguruabar pertsonal edo sozialak direla-eta.

3.- Establezimenduen titularrek eta ikuskizun eta jolas-jardueren antolatzaileek sarrera ukatu beharko diete jokaera bortitzak azaltzen dituztenei ikusle edo erabiltzaileei

enbarazu egin diezaieketenean, edo ikuskizuna edo jardueraren garapen arrunta eragozten dutenean. Sarrera, berriz, langile espezializatuek kontrolatuko dute, erregelamenduz ezarritako moduan.

4.- Establezimendu publikoaren, instalazioaren edo leku irekiaren sarreran eta saltokietan eta ikuskizunari edo jolas-jarduerari buruzko publizitatean edo propagandan, toki ageri batean eta ondo irakurtzeko moduan jarriko da zeintzuk diren onartzeko baldintzak, eta zer jarraibide ezarri den ikuskizuna edo jolas-jarduera normal garatzeko.

## **21. artikulua.- Lehen laguntza eta larrialdi-ebakuazioa.**

Erregelamendu bidez ezarriko da zein motatako establezimenduk, jendaurreko ikuskizunek eta jolas-jarduerak eduki behar dituzten langile gaituak lehen laguntza emateko eta larrialdietan jendea ebakutzeko; horretarako, kontuan izango da zer neurri edo edukiera duen ikuskizunak edo jarduera garatzen den establezimendu, instalazio edo gunek.

## **22. artikulua.- Asegurua**

Establezimendu publikoetako titularrek eta ikuskizun eta jardueren antolatzaileek aseguru-kontratu bat izenpetu beharko dute bertaratutako jendeari eta hirugarrenei gerta dakizkiekeen kalteen erantzukizun zibila eta araubidez zehazten diren zenbatekoak estaltzeko.

# **III. TITULUA.- ADMINISTRAZIOAK ESKU HARTZEA**

## **I. KAPITULUA.- ESTABLEZIMENDU PUBLIKOAK IREKITZEA.**

### **23. artikulua.- Gaikuntza-titulua.**

1.- Lege honen eranskin modura azaltzen den katalogoan jasotzen diren establezimendu publikoak irekitzeko, jarduera sailkatuko lizentzia lortu behar da, edo jarduera sailkatuaren alde aurreko jakinarazpena aurkeztu, Euskal Herriko ingurugiroa babesteko otsailaren 27ko 3/1998 Lege orokorrean aurreikusitakoaren arabera eta lege honetan aurreikusten diren eskakizunen arabera.

2.- Establezimendu publiko baten jarduera sailkatuko lizentziak edo alde aurreko jakinarazpenak gaitu egiten du establezimendu-mota bakoitzari dagozkion edo gaikuntza-titulu horretan jasotzen diren ikuskizun eta jarduerak garatzeko.

3.- Establezimendu batek jarduera bat baino gehiago egiten badu batera eta jarduera horiek bereizita azaltzen badira lege honek aurreikusten duen ikuskizun, jolas-jarduera eta establezimenduen sailkapenean, hori jasota geratu beharko da lizentzian edo alde

aurreko jakinarazpenean. Era berean, lokalak edo esparruak eremu bat baino gehiago badauka eta bakoitza erabilera baterako bada, adierazi egin beharko da zein den leku bakoitzaren edukiera.

Lege honen ondorioetarako, jarduera bateragarriak dira ordutegi eta dotazio baliokideak dituztenak, edo dotazio- edo ikusle-kopuru berak onartzen dituztenak.

4.- Establezimenduaren gaikuntza-tituluak orobat gaitzen du inoiz antzerki- edo musika-ikuskizun bat edo kultura- edo-gizarte-jarduera bat antolatzeko, nahiz eta tituluan berriaz jasota ez egon; betiere, gaikuntza-tituluan aurreikusitako gainerako baldintzarik aldatu behar ez bada hura garatzeko, eta, bereziki, edukiera, ordutegiak, instalazioak edo lokalaren konfigurazioa aldatu behar ez badira, edo autobabeserako planari eragiten ez badio plan hori beharrezkoa denean. Dena dela, udalari jakinarazpena aurkeztu beharko zaio jarduera hori hasi baino lehenago.

5.- Halaber, beharrezkoa izango da alde zuzenetik lizentzia eskuratzea edo alde zuzenetik jakinarazpena egitea ikuskizun- edo jarduera-mota aldatzen denean, instalazioak eraberritzen direnean edo horiek lekuz aldatzen direnean.

6.- Edozein arrazoiengatik establezimendua jarduerarik gabe egoten bada sei hilabetez jarraian, etenda geratuko da gaikuntza-tituluaren indarraldia, administrazioak egiaztatzen duen arte betetzen direla establezimenduari eskatzen zaizkion baldintzak.

#### **24. artikulua.- Autonomia-erkidegoan ikuskizunen eskumena duen organoak txostena ematea.**

1.- Euskal Herriko ingurugiroa babesteko otsailaren 27ko 3/1998 Lege orokorraren 58. artikuluko 4. paragrafoan xedatutakoaren arabera, jarduera sailkatuko lizentzia lortzeko prozeduretan, proiektu teknikoak eta espedienteko gainontzeko dokumentazioa helarazi beharko diote udalek Eusko Jaurlaritzan ikuskizunen eskumena duen zuzendaritzari, honako kasu hauetan:

a) 700 pertsonatik gorako ahalmena edo edukiera aurreikusita duten establezimenduak izatea.

b) Zezen-plaza finkoak izatea.

c) Jendearentzat irekitako establezimendu araubide berezikoak izatea, lege honen 14.4 artikuluen arabera.

d) Erregelamendu bidez zehazten diren beste batzuk.

2.- Proiektua hamabost eguneko epean helaraziko da, lizentzia eskatzeko espedientea hasten denetik aurrera.

3.- Eusko Jaurlaritzan ikuskizunen arloko eskumena duen zuzendaritzak txosten arrazoitu baten bidez udalari jakinarazi ahal izango dio araudi aplikagarriaren arabera derrigorrezkoak diren baldintzak ezarri dituela; eta baldintza horiek jarduera sailkatuaren lizentziari erantsiko zaizkio, obligazio modura.

Organo autonomikoak dokumentazio osoa jasotzen duenetik hilabeteko epean udalak komunikazio espresik jasotzen ez badu, txostena aldekotzat joko da.

#### **25. artikulua.- Jarduera sailkatuaren alde zuzenetik jakinarazpena.**

Jarduera sailkatuen aldez aurreko jakinarazpenetan, Euskal Herriko ingurugiroa babesteko otsailaren 27ko 3/1998 Lege orokorraren arabera aurkeztu beharreko dokumentazioa ez ezik, honako hauek ere aurkeztu beharko ditu establezimenduaren edo jardueraren titularrak:

- a) Ziurtagiria, aseguru-kontratua sinatu dela egiaztatzen duena, lege honetan ezarritako moduan.
- b) Autobabesari buruzko arategiaren arabera entregatu behar den dokumentazioa.

## **II. KAPITULUA.- ALDI BATEKO INSTALAZIOAK.**

### **26. artikulua.- Aldi bateko instalazioak.**

1.- Ikuskizun edo jolas-jardueretarako aldi baterako jartzen diren instalazio edo egitura eramangarri edo desmuntagarriek udal-lizentzia edo -baimena lortu beharko dute horretarako zehazten diren eskakizunak bete eta gero.

2.- Aldi bateko instalazio edo egituretan jendearentzat eta artistentzat exijitzen diren segurtasun-, higiene- eta erosotasun-baldintzak instalazio edo egitura finkoetan exijitzen direnen antzekoak izango dira. Baldintza horiek, bestalde, behar bezala justifikatu beharko dira espedientean, teknikari eskudunaren ziurtagiriaren bidez.

3.- Instalazioa onartzeko, antolatzaileak egiaztatu beharko du, batetik, aseguru bat daukala izenpetuta, erantzukizun zibileko arriskua eta -hala badagokio- autobabeserako plana estaltzen dituen, eta, bestetik, indarrean dagoen legedian aurreikusten diren gainerako betebeharrak betetzen dituela.

### **27. artikulua.- Terrazak.**

Gaikuntza-titulua eskuratu beharko da establezimendu nagusiari atxikirik kanpoan edo bide publikoan dauden terraza edo instalazioentzat. Gaikuntza-titulu hori udalak emango du, horretarako ezartzen den toki-araudiaren arabera. Araudi horrek, bestalde, mugatu ahal izango ditu instalazio horiek erabiltzeko ordutegiak, eta, batez ere, auzokoei eragozpenak sortu diezazkiekeen jarduerak mugatuko ditu.

### **28. artikulua.- Barrakak eta azoketako atrakzioak.**

1.- Barrakak eta azoketako atrakzioek bete egin behar dituzte indarreko arategiak ezartzen dituen segurtasun-, higiene- eta osasungarritasun-eskakizun eta -baldintzak.

2.- Barrakak eta azoketako atrakzioak zein udaletan instalatu, udal horrek eman beharko du instalatzeko baimena. Baimen hori eman baino lehenago, erantzukizun zibileko asegurua –lege honen 22. artikuluan aipatzen dena– eta honako dokumentazio hau aurkezteko exijitu du udalak:

- a) Dokumentazio teknikoa, egiaztatzen duena betetzen direla, gutxienez, atrakzioa deskribatzeko eta hura muntatu, mantendu, zaindu eta erabiltzeko jarraibideei buruzko segurtasun-baldintzak.
- b) Atrakzioaren urteko berrikuspen-ziurtagiria, eskumena duen teknikari tituludunak edo ikuskatze-erakunde egiaztatuak egina.
- c) Segurtasun- eta sendotasun-ziurtagiria, eskumena duen teknikari tituludunak edo ikuskatze-erakunde egiaztatuak egin behar duena atrakzioa muntatzen den bakoitzean.

### **III. KAPITULUA.- JENDAURREKO IKUSKIZUNAK ETA JOLAS-JARDUERAK ANTOLATZEA.**

#### **29. artikulua.- Gaikuntza-tituluak.**

1.- Interes orokorreko premiazko arrazoiak dira ordena publikoa, segurtasun publikoa, babes zibila eta osasun publikoa, bai eta kontsumitzaileak, zerbitzuen hartzaileak eta langileak babestea, ingurumena eta hiri-ingurunea babestea eta historia- eta arte-ondarea zaintzea ere. Hori dela-eta, administrazioaren baimena lortu behar da lege honetan aurreikusitako kasuetan ikuskizun eta jarduerak antolatzeko eta gauzatzeko.

2.- Establezimendu publikoetan jendaurreko ikuskizunak edo jolas-jarduerak egiteko, ez da alde zuzeneko baimen edo jakinarazpenik behar, lege honen arabera gaikuntza-tituluren baten babespean badaude ikuskizun edo jarduerak horiek.

3.- Kasu hauetan behar da administrazioaren alde zuzeneko baimena:

a) Dagokion gaikuntza-tituluaren babespean ez dauden lokaletan aldi behin jendaurreko ikuskizunak edo jolas-jarduerak egiteko, 23.4 artikuluan aurreikusitako egoeretan salbu.

b) Jendaurreko ikuskizunak edo jolas-jarduerak egiteko gaikuntza-titulua duten establezimendu publikoetan aldi behin halakoak egiteko, ikuskizun eta jarduerak horien eraginez baldintza tekniko orokorrak aldatu behar bada, segurtasuna ere aldatu behar bada, edukiera handitu behar bada, edo eskenatokiak, estalpeak edo egitura desmuntagarriak jarri behar bada.

c) Ikuskizunak eta jolas-jarduerak leku irekietan egiteko, 32. artikuluan aurreikusten den moduan.

d) Zezen-ikusketak eta -jaietarako, salbu eta arau ezartzen denean horiek egiteko alde zuzeneko jakinarazpena aurkeztu behar dela.

e) Ikuskizun piroteknikoetarako, salbu eta arau ezartzen denean horiek egiteko alde zuzeneko jakinarazpena aurkeztu behar dela.

f) Herriz kanpoko bideetan kirol-probak egiteko.

g) Ikuskizunaren edo jardueraren nolokotasuna eta ezaugarriak kontuan hartuz lege ezartzen diren beste kasuetarako, artikuluko honen lehenengo paragrafoan adierazitako interes orokorreko arrazoiak baldin badaude.

### **30. artikulua.- Baldintzak.**

Jendaurreko ikuskizunak edo jolas-jarduerak egiteko, baldintza hauek bete behar dira:

- a) Behar bezala identifikatutako pertsona edo erakundeen ardurapean deitu, antolatu eta egin behar dira, argi eta garbi zehaztuta nork zer erantzukizun duen, eta betiere lege honek ezarritakoaren arabera gaikuntza-titulu baten babespean.
- b) Lokalek edo guneek segurtasun-baldintzak, osasungarritasun- eta higiene-baldintzak eta irisgarritasun unibertsalaren baldintzak bete behar dituzte.
- c) Indarrean dagoen araudiak aurreikusiz gero, zaintzaileak eta sarbide-kontrolako langileak eduki behar dira.
- d) Autobabes-plan bat eduki behar da, hala aurreikusten badu indarrean dagoen araudiak.
- e) Erregelamenduz zehazten diren higiene- eta segurtasun-zerbitzuak eta osasun-laguntzarako egiturak eduki behar dira.
- f) Pertsonak kontatzeko eta edukiera kontrolatzeko sistemak eduki behar dira, hala dagokionean.
- g) Jendaurreko ikuskizunak edo jolas-jarduerak duen eragin akustikoaren balorazioa aurkeztu behar da, eta, hala badagokio, neurriak hartu behar dira eragin horri aurre hartzeko eta gutxitzeko.
- h) Kontratatuta eduki behar da legez eska daitekeen aseguru-poliza.
- i) Lege honetan bertan eta berau garatzeko arauetan halakoetarako eskatzen diren gainerako betekizun eta baldintzak bete behar dira.

### **31. artikulua.- Establezimenduetako ikuskizun eta jarduerak.**

1.- 29.3 artikuluko a) eta b) idatzi-zatietan adierazitako ikuskizun eta jolas-jarduerak baimentzeko, baldintza hau bete beharko da aurreko artikuluko baldintza orokorrean gain: esku-dirutan edo abal edo kauzio-poliza baten bidez fidantza bat eratzea, araz finkatzen den kopurukoa, lege honetan eta berau garatzeko araudian ezarritako eginbeharrei erantzuteko eta, zehazki, aurre egiteko zehapen-araubidearen eta ikuskizuna edo jolas-jarduera baimentzeak dakartzan tasak ordaindu behar diren ondorioz sortutako erantzukizunei.

Administrazio publikoak salbuetsita daude artikuluko honetan aipatzen den fidantza aurkeztu behar izatetik.

2.- Baimena eskatu aurretik eratu eta entregatu behar zaio fidantza administrazio baimen-emaitzari. Fidantza ez aurkeztea edo ezarritako epetik kanpo eratzea arrazoi nahikoa izango da baimena ukatzeko; halaber, fidantzak eraginkortasuna galtzea edo zenbatekoa txikitzen denean fidantza berriz ez jartzea ere arrazoi nahikoa izango da ikuskizuna edo jolas-jarduera egitea galarazteko.

3.- Fidantza kentzeko eta interesdunei itzultzeko, eskaera aurkeztu beharko zaio administrazioari, eta administrazioak baimendu egin beharko du eskatutakoa. Baimen hori emateko, fidantza jartzea eragin zuen jarduerak amaituta egon beharko du, eta



egiazatu egin beharko da ez dagoela ordaindu gabeko diru-betebeharrik fidantzak estaltzen dituen kontzeptuei dagokienez, eta ez dagoela salaketa oinarridunik, irekita dagoen aurretiazko jarduerarik, izapidetzen ari den zehapen-prozedurarik edo oraindik exekutatu gabe dagoen zehapenik.

### **32. artikulua.- Leku irekietako ikuskizun eta jarduerak.**

1.- Bide publikoan edo leku publikoetan ikuskizunak eta jolas-jarduerak egiteko, beharrezkoa da udalerrri bakoitzean leku publikoen erabilera berezirako edo erabilera pribatiborako dagoen araudiarekin bat datozen gaikuntza-tituluak edukitzea.

2.- Nolanahi ere, aldez aurreko baimen berezia beharko da ikuskizunak eta jolas-jarduerak bide publikoan edo leku publikoetan egiteko, betiere instalazio edo egitura finkoak, aldi baterakoak, eramangarriak edo desmuntagarriak erabiltzen badira ikuskizun edo jarduera horiek gauzatzeko edo ikusleentzako estalpea jartzeko.

3.- Aurreko paragrafoan adierazitako kasuetan, ikuskizunak edo jarduerak 700 pertsonatik gorako edukiera duten sarbide mugatuko barrutietan egiten direnean, Eusko Jaurlaritzan ikuskizunen arloko eskumena duen zuzendaritzak egindako txostena eskuratu beharko da baimena eman aurretik, eta, horretarako, ekitaldiari buruz dagoen informazioaren kopia bidali beharko da.

Eusko Jaurlaritzan ikuskizunen arloko eskumena duen zuzendaritzak txosten arrazoitu baten bidez udalari jakinarazi ahal izango dio araudi aplikagarriaren arabera derrigorrezkoak diren baldintzak ezarri dituela; eta ematen den baimenari erantsiko zaizkio baldintza horiek, obligazio modura.

Organo autonomikoak dokumentazio osoa jasotzen duenetik hilabeteko epean udalak komunikazio espresik jasotzen ez badu, txostena aldekotzat joko da.

4.- Artikulu honetan aurreikusten diren baimenak emateko, baimenetarako eskatzen diren baldintza eta betekizun orokorrak eta baimenen araudi espezifikokoan eskatzen direnak bete beharko dira, eta, horrez gain, jendaurreko ikuskizunak edo jolas-jarduerak eragiten duen mugigarritasunaren analisia aurkeztu beharko da. Analisi horretan, gainera, antzemandako premiei erantzuteko zer neurri berezi aurreikusten den adierazi beharko da.

### **33. artikulua.- Zezen-ikuskizun eta -jaiak.**

Erregelamenduz arautuko dira zezen-plazen eta zezen-ikuskizunak egiteko toki eta instalazioen ezaugarriak eta era horretako jarduerak antolatzeko eta garatzeko modua, horrela ikuskizunen osotasuna bermatzeko, zezenketetan parte hartzen duten profesionalen, zaletuen eta publiko orokorraren eskubideak babesteko, eta ikuskizun horien administrazio-antolaketaren berezitasunei erantzuteko.

### **34. artikulua.- Ikuskizun piroteknikoak.**

1.- Estatuan lehergaiei buruz indarrean dauden arauak eta lege hau garatzearren erregelamenduz zehazten direnak ezarriko dute zer segurtasun-baldintza bete beharko diren ikuskizun piroteknikoetan.

2.- Erregelamenduz aurreikusiko da zein kasutan izango den nahikoa alde aurreko jakinarazpena aurkeztea ikuskizun piroteknikoak egiteko, erabiltzen den lehergai-motaren eta -kopuruaren arabera.

### **35. artikulua.- Herriz kanpoko bideetako kirol-probak.**

Herriz kanpoko bideetan kirol-probak egiteko, proba egitekoa den lekuaren titularren adostasuna behar da, eta, horrez gain, Eusko Jaurlaritzaren baimena lortu behar da aurretik, hain zuzen ere trafikoko eta bide-segurtasuneko eskumenak dituen zuzendaritzarena. Bestalde, horrelako probak egiteko, bide-segurtasuneko araudian, lege honetan eta lege hau garatzeko arauetan ezarritakoa bete beharko da.

### **36. artikulua.- Eskumenak.**

1.- Jendaurreko ikuskizunei eta jolas-jarduerari dagokienez, udalek hau dena egiteko ahalmena dute, hirigintza, hiri-ingurumen eta osasungarritasun publikoaren babesaren arloetan dauzkaten eskumenen garapen gisa:

a) Establezimenduetan aldian behin ikuskizun eta jarduerak egiteko alde aurreko jakinarazpenak jasotzea, 23.4 artikuluekin bat etorritik.

b) Gehienez 700 pertsonako ahalmena edo edukiera duten lokal edo establezimenduetan aldian behin ikuskizun eta jarduerak egiteko baimena ematea, 29.3 artikuluko a) eta b) idatzi-zatietan ezarritakoarekin bat etorritik.

c) Leku irekietan ikuskizunak eta jolas-jarduerak egiteko gaikuntza-tituluak ematea, 29.3.c) eta 32. artikuluek aurreikusitako baldintzetan.

2.- Gerta daiteke dena delako ikuskizun edo jolas-jarduerak aldi berean udalerrri bat baino gehiago hartzea. Halakoetan, udalerrri horietan guztietan lortu beharko da alde aurreko baimena, edo aurkeztu beharko da alde aurreko jakinarazpena, kasuaren arabera.

3.- Ikuskizunen arloko eskumena duen Eusko Jaurlaritzako zuzendaritzari dagokio hauek guztiak egitea:

a) 700 pertsonatik gorako ahalmena edo edukiera duten lokal edo establezimenduetan aldian behin ikuskizun eta jarduerak egiteko baimena ematea, 29. artikuluko a) eta b) idatzi-zatietan ezarritakoarekin bat etorritik.

b) 32.3 artikuluan aurreikusten diren ikuskizun eta jolas-jarduerak egiteko baimenen txostenak egitea. Txosten horiek lotesleak izango dira baimenak ukatzen direnean edo derrigor bete beharreko baldintzak ezartzen zaizkienean baimenei.

c) Zezen-ikuskizun eta -jaiak egiteko baimenak ematea edo, hala badagokio, ikuskizun eta jai horien alde aurreko jakinarazpenak jasotzea.

d) Ikuskizun piroteknikoak egiteko baimenak ematea edo, hala badagokio, ikuskizun horien aldez aurreko jakinarazpenak jasotzea.

4.- Eusko Jaurlaritzan trafiko eta bide-segurtasuneko eskumena duen zuzendaritzari dagokio baimenak ematea herriz kanpoko bideetan kirol-probak egiteko.

### **37. artikulua.- Baimenen araubide juridikoa.**

1.- Ikuskizunak edo jolas-jarduerak egiteko ematen diren baimenak ikuskizun edo jarduera horiek egitearekin batera bukatzen dira.

2.- Lege honetan araututako baimenak eskuratu behar dituzte jendaurreko ikuskizunek, jolas-jarduerak eta establezimendu publikoek, baina baita beste baimen hauek ere: ikuskizunaren edo jardueraren ezaugarrien arabera indarrean dagoen legediak exijitzen dituenak.

3.- Lege hau garatzeko egiten diren erregelamendu espezifikoei aurreikusten duten epea erabiliko da jendaurreko ikuskizunak edo jolas-jarduerak baimentzeko eskaerak ebazteko eta ebazpen horiek jakinarazteko.

Erregelamendu espezifikorik ez badago, hiru hilabetekoa izango da 32. artikuluko 2. eta 3. paragrafoetan aurreikusten diren baimenak lortzeko prozedurak ebazteko eta ebazpen horiek jakinarazteko epea. Epe horretan ebazpenaren jakinarazpenik jasotzen ez bada, eskatutako baimena ukatu zaiola ulertu ahal izango du interesdunak. Administrazioak ebazpen espresa emateko betebeharraren kalterik gabe ulertu behar da hori guztia.

Gainontzeko kasuetan, lege hau garatzeko erregelamendu espezifikoei besterik ezarri ezean, ikuskizuna edo jarduera egiteko aurreikusten den eguna baino gutxienez hamar egun lehenago aurkeztu beharko da eskaera. Ikuskizuna edo jarduera egin baino hirurogeita hamabi ordu lehenago ez bada ebazpenaren jakinarazpenik egiten, eskatutako baimena eman zaiola ulertu ahal izango du interesdunak.

### **38. artikulua.- Aldez aurreko jakinarazpenaren araubidea.**

1.- Aldez aurreko jakinarazpena eska daitekeen kasuetan, jendaurreko ikuskizuna edo jolas-jarduera hasi baino gutxienez hamar egun lehenago aurkeztu behar da jakinarazpen hori, eta hau dena adierazi behar da bertan:

a) Nor den establezimenduaren titularra edo ikuskizun edo jardueraren antolatzailea.

b) Zer jendaurreko ikuskizun, jolas-jarduera edo zerbitzu emango den.

c) Zenbat denbora iraungo duen.

d) Zer establezimendu publikotan edo zein tokitan egingo diren egin beharreko ikuskizun edo jarduerak.

e) Zein den toki horien edukiera edo zenbat lagun hartu ahal duten.

f) Arauz ezarritako gainerako dokumentazioa.

2.- Aldez aurreko jakinarazpenak dena delako jendaurreko ikuskizuna edo jolas-jarduera egitea ahalbidetzen du, baina, hala ere, egiztatu, kontrolatu eta ikuskatu ahal izango du administrazio eskudunak. Baimenaren indarraldia ikuskizuna edo jarduera egitearekin bukatuko da.

3.- Aldez aurreko jakinarazpenik ez bazaio aurkezten administrazio eskudunari, edo jakinarazpenarekin batera doan edo hari eransten zaion edozein funtsezko datu, adierazpen edo dokumentu zehaztu gabea edo faltsua bada edo ez bada aurkezten, gorabehera hori antzematen denetik aurrera ezin izango da jarraitu dena delako eskubideaz baliatzen edo jarduera egiten, eta, gainera, erantzukizun penal, zibil eta administratiboak eskatu ahal izango dira. Halakoetan, administrazio eskudunak jendaurreko ikuskizuna edo jolas-jarduera bertan behera utzi ahal izango du.

## **IV. TITULUA.- ZAINZA, KONTROLA ETA IKUSKARITZA.**

### **I. KAPITULUA.- XEDAPEN KOMUNAK**

#### **39. artikulua.- Mantentze-lanak eta berrikusketak egiteko betebeharra.**

1.- Establezimenduak eta instalazioak beti akatsik gabe funtzionatzeko moduan edukitzeko betebeharra dute titularrek eta antolatzaileek; hau da, arautegi aplikagarrian eta dagokion baimenean nahiz aldez aurreko jakinarazpenean ezartzen den bezala eduki behar dituzte establezimendu eta instalazioak.

2.- Lege honen aplikazio-eremuan dauden establezimendu publikoen titularrek beste betebeharrak ere badute: aplikagarri zaien arloko araudian aurreikusten diren funtzionamendu-kontrolak eta berrikusketak teknikoak egitea establezimendu eta instalazioei.

#### **40. artikulua.- Egiatzenak eta kontrolak.**

Aurreko artikuluan xedatutakoa gorabehera, administrazio publikoetako organoek, nork bere eskumenean eremuan, zaindu eta begiratuko dute ea betetzen diren jendaurreko ikuskizunei, jolas-jarduerari eta establezimendu publikoari buruzko legeak. Horretarako, ahalmen hauek izango dituzte:

- a) Establezimenduak eta instalazioak ikuskatzeko ahalmena.
- b) Ikuskizunak eta jolas-jarduerak nola egiten diren kontrolatzeko ahalmena.
- c) Debekatzeko, bertan behera uzteko, ixteko eta beharrezko irizten diren segurtasun-neurriak hartzeko ahalmena.
- d) Hartu beharreko behin-behineko neurriak hartzeko ahalmena, eta lege honetan tipifikatutako arau-hausteei zehapenak ezartzeko.

## **II. KAPITULUA.- IKUSKATZEA.**

### **41. artikulua.- Ikuskatze- eta kontrol-eskumenak.**

1.- Lege honen arabera udalari dagokionean jendaurreko ikuskizun eta jolas-jardueretarako baimenak ematea edo horiek egiteko aldez aurreko jakinarazpenak jasotzea, udalak berak ikuskatuko ditu udalerriko establezimendu publikoak eta instalazioak, eta hark egingo du establezimendu eta instalazioetan egiten diren jardueren eta gainontzeko ikuskizun eta jolas-jardueren kontrola.

2.- Ikuskizunen arloko eskumenak dituen Eusko Jaurlaritzako zuzendaritzak eskumena du berak baimendu beharreko ikuskizun eta jolas-jarduerak ikuskatu eta kontrolatzeko. Halaber, aldez aurreko jakinarazpena jasotzea berari dagokion kasuetan ere, eskumena du ikuskatze- eta kontrol-lan horiek egiteko.

3.- Ikuskizunen arloko eskumenak dituen Eusko Jaurlaritzako zuzendaritzak aldizkako ikuskatze-lanak egin ahal izango ditu establezimendu publikoetan, establezimendu horiei lizentzia emateko beharrezkoa bada zuzendaritza horrek nahitaezko txostena egitea. Halaber, ikuskatu eta kontrolatu egin ahal izango ditu ikuskizunak eta jolas-jarduerak, horiek baimendu aurretik, dagokion udalerraren lana osatuz eta harekin koordinazioan, zuzendaritza horrek legez txostena egin behar badu.

4.- Pertsonen bizikidetzara, segurtasuna edo osasuna arriskuan jartzen den kasuetan, ikuskizunen arloko eskumenak dituen Eusko Jaurlaritzako zuzendaritzak udalen ikuskatze-jarduera bere gain har dezake; hain zuzen ere, egiaztatzen denean udalek ez dutela zeregin hori betetzen, betetzeko eskatuta ere. Ikuskatze-lan horiek udalaren kontura egingo dira, udalak bitarteko eta langile tekniko nahikoak eduki arren ikuskatze-lanok egiten ez dituenean.

### **42. artikulua.- Ikuskatze-lanetarako irizpideak eta koordinazioa.**

1.- Jendaurreko Ikuskizunen eta Jolas Jardueren Euskal Kontseiluak txostena egin eta gero, Eusko Jaurlaritzak onartuko ditu establezimendu publikoak, jendaurreko ikuskizunak eta jolas-jarduerak ikuskatzeko kontuan hartu behar diren helburu eta lehentasunak, eta helburu eta lehentasun horiek bete beharko dituzte, lurralde osoan, bere ikuskatze-zerbitzuek eta udalen ikuskatze-zerbitzuek.

Era berean, ikuskaritza-planak udalekin batera egiten eta adosten saiatuko da Eusko Jaurlaritza, ikuskaritza koordinaturik egitearren eta antzeko ikuskatze-irizpide eta -metodologiak erabiltzearren.

2.- Aurreko paragrafoan adierazitako programazio hori osatzeko orduan, kontuan izan beharko da zer garapen eta bilakaera duen aisialdiaren arloak, zer eragin duen gizartean, jarduerak zer garrantzi duten, nolakoak diren edo zein egoeretan dauden, eta nolako disuasio-efektua lortu nahi den ikuskaritza-lanarekin.

3.- Artikulu honetan aipatzen diren helburu eta lehentasunen esparruan, Eusko Jaurlaritzak eta udalek ikuskatze-programak finkatu behar dituzte, eta programa horiek ezagutarazi behar dizkiete programen eraginpean dauden beste administrazioei.

### **43. artikulua.- Ikuskaritza nork nola egin.**

1.- Ertzaintzako Joko eta Ikuskizun Ataleko kideek, udaltzaingoetako kideek edo eskumena duen administrazioko organo eskudunak izendatutako funtzionario publikoek ikuskatuko dituzte establezimendu publikoak eta instalazioak –azken funtzionario horiek ere eginkizunak betetzen ari diren agintaritza-agentetzat hartuko dira–, eta, horrez gain, ikuskizunak eta jolas-jarduerak ere kontrolatuko dituzte. Ikuskatze-lanak egiteko eskumena duen administrazioak, halaber, kasu bakoitzean eskatzen diren zehaztasun teknikoak dituzten beste pertsona edo erakunde batzuk gaitu ditzake ikuskatze-lanak egiteko.

2.- Establezimenduaren egitura, ekipamendua edo dokumentazioa baldin bada ikuskatu beharrekoa, bi erataraino egin daitezke ikuskatze-lana: aurretiaz programatuta; edo aurretik abisatu gabe, dena delako establezimendua edo jarduera martxan dagoen bitartean edo entsegu edo prestaketa-ekintzak egiten ari diren bitartean, hartara establezimendua, ikuskizuna edo jarduera benetan nola doan ikusteko. Edonola egiten delarik ere, ahalik eta nahasmendurik txikiena eragingo zaio jarduerari.

3.- Lokal eta instalazioen titularrek eta ikuskizun eta jolas-jardueren antolatzaileek obligazioa dute ikuskatze- eta kontrolatze-lanetarako baimenduta dauden pertsonen edozein momentutan sartzen uzteko, eta ikuskatze-lanetan laguntzeko. Ikuskatzaileak titulartasun publiko edo pribatuko edozein toki, instalazio edo bulegotara sar daitezke, betiere etxeetan sartzeko konstituzio-mugak gainditu gabe.

4.- Eskumena duten administrazio publikoek edozein unetan eska diezaiekete lokal eta instalazioen titularrei edo ikuskizun eta jolas-jardueren antolatzaileei aurkez dezatela eskatzen zaizkien segurtasun-baldintzak betetzen dituztela egiaztatzen duen dokumentazioa.

5.- Ikuskapen bakoitzeko, akta bat egingo da, eta interesdunak, ondorioekin ados ez baldin badago, aktan adierazi ahal izango du bere desadostasuna. Akta hori interesdunari jakinarazi eta eskumena duen administrazio-organismoari helaraziko zaio.

6.- Ikuskapenaren emaitzek irregulartasunak daudela adierazten badute, ikuskaritzak, irregulartasun horiek pertsonen edo ondasunen segurtasunean edo herritarren arteko bizikidetzan nolako eragina duten ikusita, aukera hauek izango ditu:

a) Irregulartasunak konpontzeko egin beharreko aldaketak edo hobekuntzak egiteko eskatzea aktan bertan, horretarako epea finkatzea, eta aldaketa edo hobekuntzak epe barruan egiten ez badira zehapen-espeditentea ireki eta organo eskudunari igortzea.

b) Salatuari salaketa unean bertan egin eta jakinaraztea. Salaketa hori bera izango da zehapen-prozedurari hasiera emateko erabakia, eta, kasu guztietan, ustezko erantzulearen eskubideak babesteko beharrezkoak diren datuak azalduko dira bertan, azaroaren 26ko 30/1992 Legearen 135. artikulua ezarritakoarekin bat etorriz.

### **III. KAPITULUA.- SEGURTASUN-NEURRIAK.**

#### **44. artikulua.- Polizia-zaintza.**

1.- Euskadiko polizia-kidegoetako zaintza-zerbitzu arruntek arreta berezia jarriko dute egiten diren ikuskizun eta jolas-jardueretan, bakoitzak bere eskumenen eremuan.

2.- Ikuskizun edo jolas-jardueretan jende asko bilduko delako, lehenago ere istiluak edo indarkeriazko ekintzak gertatu izan direlako edo herritarren ordena eta lasaitasuna nahasteko arriskua egon litekeela pentsatzen delako beharrezkotzat jotzen bada polizia-segurtasuneko dispositibo bereziak aurreikustea, polizia-kidegoen arteko koordinaziorako ordenamendu juridikoan aurreikusitakoaren arabera koordinatuko dira dispositibo horiek.

3.- Kirol-ikuskizunetan indarkeriari, arrazakeriari eta xenofobiari aurrea hartzeko ahaleaginean, dena delako ikuskizunerako onartuta dauden arauetan jartzen duena eta lege honetan eta lege hau garatzeko arauetan xedatuta dagoena bete beharko da.

#### **45. artikulua.- Debekatzea eta bertan behera uztea.**

1.- Kasu batzuetan, lege honen arabera jendaurreko ikuskizunak eta jolas-jarduerak baimentzeko, kontrolatzeko eta ikuskatzeko eskumena duten administrazio-agintaritzek ikuskizun eta jarduera horiek debekatu edo, hasita baldin badaude, bertan behera utz ditzakete, Euskal Autonomia Erkidegoan segurtasun publikoaren eskumenak dituzten agintaritzen eskumenetatik ezer kendu gabe. Hona hemen kasu horiek:

a) Zer diren edo nolakoak diren ikusita, lege honetan aurreikusitakoaren arabera debekatzekoak izatea.

b) Nahitaez eduki beharreko aldez aurreko baimen edo jakinarazpenik ez edukitzea, edo horietan azaltzen diren baldintzak aldatzea, eta eskatzen zaizkien segurtasun-baldintzak ez betetzea.

c) Benetako arriskua egotea pertsonentzat eta ondasunentzat.

d) Pertsonak eta ondasunak arriskuan jartzeko moduko nahasmendu larria gertatzea edo aurreikustea.

2.- Aurreko paragrafoko a), c) eta d) idatzi-zatietako kasuetan, agintaritzak ikuskizunean edo jolas-jardueran dauzkan ordezkariak ikusten baldin badute egoera benetan larria dela, ikuskizuna edo jarduera bertan behera uzteko agindu dezakete ordezkari horiek. Erabakia beraiek hartu beharko dute, baina antolatzaileei aurretiaz abisatuta.

#### **46. artikulua.- Ixtea eta zigilatzea.**

1.- Eskumena duten agintariek, halaber, interesdunei entzunaldia eskaini eta gero, itxi eta zigilatu ahal izango dituzte aldez aurreko lizentzia edo jakinarazpenik gabeko lokal eta instalazioak. Ebazpen arrazoitua eman beharko dute horretarako.

2.- Era berean, neurri horiek hartu ahal izango dituzte lizentzia daukaten lokal eta instalazioekin edo aldez aurreko jakinarazpena aurkeztu dutenekin, baldin eta pertsona eta ondasunen segurtasuna edo osasungarritasun publikoa arrisku larrian jartzen duten akatsik badute.

Kaltea berehala gertatzeko arriskua baldin badago, neurri horiek interesdunari entzun gabe ere har daitezke. Hain zuzen ere, agintaritza eskudunek edo ikuskari-lanetan ari diren agenteek edo funtzionarioek har ditzakete. Azken horiek hartzen badituzte urgentziazko horrelako neurriak, agintaritza eskudunak berretsi beharko ditu, gehienez ere hirurogeita hamabi orduko epean eta, berretsi ezean, indarrrik gabe geratuko dira.

3.- Neurri horiek eraginkorrak izango dira egoera eragin duten arrazoiek bere horretan dirauten bitartean.

#### **47. artikulua.- Konfiskatzea.**

Segurtasuna bermatzeko hartutako neurriak eraginkorrak izan daitezzen, beste aukera bat ere badago: debekatu edo bertan behera utzi den ikuskizun eta jarduerako ondasunak konfiskatzea, behar bezain beste denborarako. Agintaritza eskudunek egin dezakete hori edo, bestela, zuzenean, agente edo funtzionario ikuskatzaileek.

#### **48. artikulua.- Agintaritza eskudunak.**

Ikuskatzeko eta kontrolatzeko eskumenak dituzten administrazioek daukate eskumena kapitulu honetako 45., 46. eta 47. artikuluetan aurreikusita dauden segurtasun-neurriak hartzeko.

## **V. TITULUA.- ZEHATZEKO ARAUBIDEA**

### **I. KAPITULUA.- ARAU-HAUSTEAK**

#### **49. artikulua.- Arau-hauste administratiboak.**

1.- Ikuskizun, jolas-jarduera eta establezimenduen arloko arau-hauste administratibotzat joko dira lege honetan tipifikatuta dauden ez-egiteak edo ekintzak. Arau-hauste horiek, bestalde, lege hau garatzen duten erregelamenduetan zehaztu ahal izango dira, betiere ezertan aldatu gabe eragin ditzaketen erantzukizun zibil eta penalak edo bestelako erantzukizunak.

2.- Esparru honetako arau-hauste administratiboak oso larriak, larriak eta arinak izan daitezke.

#### **50. artikulua.- Arau-hauste oso larriak.**

Hauek dira arau-hauste oso larriak:

1.- Jendaurreko ikuskizunak edo jolas-jarduerak egitea nahitaezko lizentzia edo baimenik gabe edo, hala badagokio, alde zuzeneko jakinarazpena aurkeztu gabe, edo lizentzia, baimen eta jakinarazpen horietan ezarritako baldintzak ez betetzea, eta, horren guztiaren ondorioz, pertsona edo ondasunentzako arrisku larria eragitea.



2.- Baimendutako gehieneko jende-edukiera gainditzea eta, ondorioz, pertsona eta ondasunentzako arrisku handia eragitea.

3.- Indarrean dagoen araudian ezarritako edo lizentzia, baimen edo ikuskapenean exijitutako segurtasun-neurriak ez betetzea, eta lokalak edo instalazioak egoera kaskarrean edukitzea, bermatu beharreko segurtasun-maila asko murriztuz.

4.- Establezimendu, esparru edo instalazioak ez erabiltzea gaikuntza-tituluaren arabera erabili beharreko jardueretarako, beste batzuetarako baizik; eta, horrela, pertsona eta ondasunentzako arrisku larriko egoerak eragitea.

5.- Lizentziak edo baimenak baimendutako edo aldez aurreko jakinarazpenean adierazitako ikuskizun edo jolas-jarduera egin beharrean, beste bat egitea, pertsonak eta ondasunak arrisku larrian jarritz.

6.- Sarrera ukatzeko eskubidea arbitrarioki, diskriminazioz edo gehiegikeriaz erabiltzea.

7.- Pertsonak ebakutzeko ezarritako baldintzak ez betetzea, eta arau orokorretan edo baimen edo lizentzian ezarritako prebentzio-neurriak ez aplikatzea, larriki murriztuz eskatzen den segurtasun-maila.

8.- Lege honek berariaz debekatzen dituen ikuskizunak eta jolas-jarduerak egitea.

9.- Jendaurreko ikuskizunak edo jolas-jarduerak debekatzeko edo bertan behera uzteko agintzen duten segurtasun-neurriak ez betetzea, ez eta ixteko eta zigilatzeo neurriak ere.

10.- Administrazio-bidean irmoak diren ixteko edo bertan behera uzteko zehapenak dituzten establezimendu publikoak, lokalak edo instalazioak berriz irekitzea, zehapenok oraindik indarrean direla.

11.- Ikuskizun edo jolas-jardueraren bat egitea, horretarako gaitasuna kentzeko zehapena oraindik indarrean dela.

12.- Benetakoak ez diren dokumentu edo datuak aurkeztea jendaurreko ikuskizun, jolas-jarduera eta establezimendu publikoei buruzko prozeduretan.

13.- Bi arau-hauste larri edo gehiago egiteagatik administrazio-bidean emandako ebazpen irmo baten bidez zehapena jaso ondoren, berriz ere arau-hauste larri bat egitea, urtebeteko epean.

## **51. artikulua.- Arau-hauste larriak.**

Hauek dira arau-hauste larriak:

1.- Aurreko artikuluko 1, 2, 3, 4 eta 5 zenbakietan jasotzen diren arau-haustek egitea, baina pertsonak edo ondasunak arrisku larrian jarri gabe.

2.- Bete beharreko higie- eta osasungarritasun-neurriak ez betetzea, eta horrek pertsonen edo ondasunen segurtasunean eragitea.

3.- Garbitasun edo higie falta bainugela eta komunetan.

4.- Establezimendu publikoak errentan uztea edo lagatzea ikuskizun edo jarduerak egiteko –baita lege honen 3.2. artikuluan zehaztutako ikuskizun edo jarduerak egiteko ere–, indarrean dagoen legediak agindutako segurtasun-neurriak leku horietan betetzen ez direlarik.

5.- Adingabeei sartzan uztea adingabeentzat debekatuta dauden jendaurreko ikuskizun, jolas-jarduera eta jendearentzat irekitako establezimenduetan.

6.- Establezimendu publikoetan ez betetzea pertsonen ebakuaziorako neurriak, koloka larrian jartzen ez delarik pertsona eta ondasunentzako eskatzen den segurtasuna.

7.- Armekin edo arma modura erabil daitezkeen objektuekin sartzan edo joatea establezimendu publikoetara edo jendaurreko ikuskizun nahiz jolas-jardueretara.

8.- Armak edo objektu arriskutsuak sartzan uztea edo halakoak onartzea, derrigorrezko kontrola eskatzen den kasuetan kontrol hori ez egiteagatik.

9.- Erreklamazio-orriak edukitzeko obligazioa ez betetzea, edo bezero nahiz erabiltzaileei orriok eman nahi ez izatea.

10.- Legeak agindutako aseguru-kontratua sinatuta edukitzeko obligazioa ez betetzea.

11.- Petardo, jautigairik gabeko arma, bengala eta bestelako su artifizialak erabiltzea, lortu beharreko baimenik gabe edo kasu bakoitzean aplikatu beharreko araudian ezarritako betekizunak bete gabe.

12.- Zaintza-zerbitzuak edo -neurriak edo sarrerak kontrolatzeko sistemak ez betetzea, lege honetan jasotakoaren arabera derrigorrezkoak direnean.

13.- Mugikortasun urria duten pertsonak jendaurreko ikuskizun, jolas-jarduera eta establezimendu publikoetara iristea bermatzen duten baldintzak ez betetzea.

14.- Jendaurreko ikuskizunak edo jolas-jarduerak justifikaziorik gabe bertan behera uztea edo aldatzea.

15.- Ikusleek ikuskizuna osorik ikusiko dutela edo jolas-jardueran iragarri bezala parte hartuko dutela bermatzen duten baldintzak ez betetzea.

16.- Ikuskizuna ez egiten tematzea, programatutako ikuskizuna aldatzea edo ikuskizuna egiteko ezarritako arauak ez betetzea, justifikaziorik gabe.

17.- Artistek edo jotzaileek, antolatzaileek edo establezimenduetako titularrek edota horiek kontratatutako pertsonak begirunerik gabe jokatzera, nahierako tratua ematea, inor baztertzea edo ikusleak nahita xaxatzea, eta, horrela, giroa asaldatzeko arriskua eragitea.

18.- Iragarritako ikuskizuna edo jolas-jarduera aldatu edo bertan behera lagaz gero, sarrerak erosteko ordaindutako dirua ez itzultzea, erregelamenduz hala egingo dela aurreikusita dagoenean.

19.- Ikusleei edo erabiltzaileei ez uztea lokal edo establezimenduko zerbitzu orokorrak erabiltzen.

20.- Ikuskizuna edo jolas-jarduera behar bezala garatzeko oztopo diren asaldurak edo ikusleak arriskuan jar ditzaketen asaldurak eragitea, edo halakorik gertatzen uztea.

21.- Ikusleak agertokira edo ikuskizunaren lekura joatea ikuskizuna edo jolas-jarduera martxan dela, hala aurreikusita dagoenean izan ezik.

22.- Ikusleen aukeratzeko gaitasuna nahasteko edo engainatzeko asmoa duen informazioa zabaltzea, edo halako promozio eta publizitatea egitea.

23.- Lege honek ezartzen dituen funtzionamendu- eta berrikusketa-kontrolak ez egitea.

24.- Adingabeen ongizate fisikoa, psikikoa edo morala kolokan jar lezaketan jendaurreko ikuskizunak edo jolas-jarduerak egitea, horretara eraman dezakeen dekorazioa jartzea establezimenduetan, edo horri buruzko publizitatea egitea.

25.- Oinarrizko eskubideen kontrako ekintzetara dei egiten duten jantzi, sinbolo edo gauzaren bat daukatenei baimena ematea jendaurreko ikuskizun edo jolas-jardueraren bat ematen ari diren esparru, lokal, establezimendu edo instalazioetara sartzeko, eta, bereziki, indarkeriara, xenofobiara edo bazterkeriara dei egiten duen edozer badaramate.

26.- Erositako sarrera edo abonamenduak errekaruarekin birsaltzea edo komisioarekin saltzea, baimenik gabe edo ezkutuan, eta lege honetan nahiz lege hau garatzeko arauetan sarrerak eta txartelak saltzeko ezarritako baldintzak ez betetzea.

27.- Lanean dabiltzan agintaritzaren agenteei edo funtzionario ikuskatzaileei ez uztea establezimendura edo esparrura sartzeko, eta haiei laguntzeko prest ez egotea.

28.- Establezimenduen titularrek edo jendaurreko ikuskizun eta jolas-jardueretako antolatzaileek ikuskizunetan edo jardueretan parte hartzen dutenei, beraien mende daudenei eta ikusleei edo erabiltzaileei onartzea edo uztea lege honetan aurreikusitako arau-hausteak egiten.

29.- Bi arau-hauste arin edo gehiago egiteagatik administrazio-bidean emandako ebazpen irmo baten bidez zehapena jaso ondoren, berriz ere arau-hauste arin bat egitea, urtebeteko epean.

30.- Aurreko artikuluan aurreikusitako edozein arau-hauste egitea, nolakoa den eta zergatik eta zer egoeratan egin den kontuan hartuta oso larritzat kalifikatu behar ez bada.

## **52. artikulua.- Arau-hauste arinak.**

Hauek dira arau-hauste arinak:

1.- Aldez aurreko jakinarazpena nahitaezkoa denean, hori aurkeztu gabe egitea ikuskizunak eta jolas-jarduerak.

2.- Titulartasun-aldaketa ez jakinaraztea lege honek ezarritakoaren arabera.

3.- Lege honen 15. artikuluko informazio-eta publizitate-obligazioak ez betetzea, eta jendaurreko ikuskizunen eta jolas-jardueren promozioaz edo publizitateaz arduratzen diren enpresek ez betetzea artikuluko horrek lankidetzan jarduteko ezartzen dien betebeharra.

4.- Beharrezko baldintzak betetzen ez dituzten erreklamazio-orriak edukitzea.

5.- Informazio nahikoa ez duen eta, bereziki, lege honek agintzen duen informazioa ez duen publizitatea zabaltzea jendartearen.

6.- Ikusleek, bertaratuek edo erabiltzaileek errespeturik gabe jokatzeko artista edo jotzaileekin, antolatzaile eta titularrekin, horiek kontratatutako pertsonekin eta gainerako publikoarekin, eta alderantziz.

7.- Ikusle, bertaratu edo erabiltzaileak agertokira edo jotzaileen edo artisten antzezlekura joatea ikuskizuna hasi aurretik edo amaitu eta gero.

8.- Lege honen 16.2 artikulua agintzen duen informazioa ez daukaten sarrerak ateratzea.

9.- Jendaurreko ikuskizun edo jolas-jarduerarako jarritako hasteko edo bukatzeko ordua ez betetzea, edo jendearentzat irekitako establezimenduak ixteko edo irekitzeko orduak ez betetzea.

10.- Establezimendutik irtetean edo establezimendura sartzean zarata ateratzea edo eragozpenak eragitea, inguruko auzokoei atsedena galarazteko moduan.

11.- Ikusleek eta erabiltzaileek ez betetzea lege honen 8. artikulua agintzen dituen betebeharrak eta obligazioak, betiere ez-betetze hori ez bada artikulua honetan bertan jasotako beste arau-hauste mota bat edo arau-hauste larri edo oso larri bat.

12.- Pertsona-taldeek ostalaritzako lokaletatik kanpo eskuratutako edariak edatea kalean edo leku publikoetan, eta elkarretaratze edo edari-kontsumo horren ondorioz leku publikoa erabiltzen dutenei edo auzokoei eragozpenak eragin, inguruaren lasaitasuna asaldatu edo egoera osasungaitzak sorrarazi ahal izatea.

13.- Aurreko artikuluan aurreikusitako edozein arau-hauste egitea, nolakoa den eta zergatik eta zer egoeratan egin den kontuan hartuta larrizat kalifikatu behar ez bada.

14.- Lege honetan eta lege honek aipatzen dituen erregelamenduetan ezarritakoa ez betetzea, eskumena daukan administrazioan egin beharreko izapideei dagokienez edo jardura edo ikuskizuna aurrera eramateko epe, baldintza edo betekizunei dagokienez; betiere arau-hauste larri edo oso larrizat tipifikatuta ez badago ez-betetze hori.

### **53. artikulua.- Erantzuleak.**

1.- Lege honetan tipifikatutako ekintza edo ez-egiteen egileak izango dira arau-hauste administratiboaren erantzuleak, nahiz eta ez-betetze hutsez hautsi araua; zehazki, honako hauek izango dira erantzuleak:

a) Ikuskizun edo jolas-jarduerak egiteko lokal edo instalazioen titularrak, edo dagokion lizentzia edo aldez aurreko jakinarazpenak.

b) Ikuskizun eta jolas-jardueren antolatzaileak, haien ardurapean egiten diren ekintza eta ez-egiteen kasuan.

c) Artista, interpretatzaile eta jotzaileak, eta establezimendu, ikuskizun eta jolas-jardueren zerbitzura dauden gainontzeko pertsonak.

d) Ikusle eta erabiltzaileak.

2.- Eskatu beharreko lizentzia edo baimenak ez badira eskatzen edo ez badira aldez aurreko jakinarazpenak aurkezten, jendaurreko ikuskizun edo jolas-jardueraren deialdia egiten duena edo horiek jakitera ematen dituen joko da titulartzat edo

antolatzailetzat eta, halakorik ez badago, jendaurreko ikuskizuna edo jolas-jarduera egingo den establezimendu publiko, instalazio edo leku irekira sartzeko txartelen salmentako diru-sarrerak lortzen dituen.

3.- Titularrek eta antolatzaileek ez badute betetzen arau-hausteei aurrea hartzeko betebeharra, haiek izango dira lege honetan araututako arau-hauste administratiboen erantzule solidarioak, nahiz eta arau-hausteok beste norbaitek edo haien mende daudenean egin.

4.- Erantzule solidarioak izango dira titular eta antolatzaileak, ikusleei edo erabiltzaileei egintzaz edo ez-egitez onartzen edo uzten dietenean arau-hausteak egiten.

5.- Erantzule indibidual bat baino gehiago baldin badago, eta ezin bada zehaztu bakoitzak zein neurritan parte hartu duen arau-haustean, erantzukizuna denen artean banatuko da.

## **II. KAPITULUA.- ZEHAPENAK**

### **54. artikulua.- Arau-hauste oso larriak egiteagatik ezarri beharreko zehapenak.**

Arau-hauste oso larriak egiten direnean, zehapen hauetako bat edo gehiago jarri ahal izango dira, denak batera edo banaka, betiere arau-haustearen izaera, garrantzia eta behin edo behin baino gehiagotan egiten den kontuan hartuta:

- a) 30.001 eurotik 150.000 eurora arteko isuna.
- b) Jarduera edo jarduerak bertan behera uztea edo debekatzea, urtebete eta egun batetik hiru urtera.
- c) Lokala edo establezimendua itxi eta zigilatzea, urtebete eta egun batetik hiru urtera.
- d) Emandako baimena edo lizentzia errebokatzea.
- e) Jarduera bera egiteko edo jendaurreko ikuskizunak eta jolas-jarduerak antolatzeko edo sustatzeko desgaitzea, sei hilabete eta egun batetik gehienez urtebete eta sei hilabetera.
- f) Jarduerarekin lotutako ondasunak konfiskatzea edo, egokia bada, desegitea, sei hilabete eta egun batetik gehienez urtebetera. Baimenik gabe edo alde aurreko jakinarazpenik gabe egindako jendaurreko ikuskizunen eta jolas-jardueren kasuan, ezin baldin badira b), c) eta d) idatzi-zatietan zehaztutako zehapenak jarri, konfiskatzea mugagabea izan daiteke; bereziki, antolatzaileak ez baldin badira identifikatzen edo antolatzaileek ez baldin badute ordaindu nahi ezarritako diru-zehapena.

### **55. artikulua.- Arau-hauste larriak egiteagatik ezarri beharreko zehapenak.**

Arau-hauste larriak egiten direnean, zehapen hauetako bat edo gehiago jarri ahal izango dira, denak batera edo banaka, betiere arau-haustearen izaera, garrantzia eta behin edo behin baino gehiagotan egiten den kontuan hartuta:

- a) 1.201 eurotik 30.000 eurora arteko isuna.
- b) Jarduera edo jarduerak bertan behera uztea edo debekatzea, urtebetez gehienez ere.
- c) Lokala edo establezimendua itxi eta zigilatzea, urtebetez gehienez ere.
- d) Jarduera bera egiteko edo jendaurreko ikuskizunak eta jolas-jarduerak antolatzeke edo sustatzeko desgaitzea, sei hilabetez gehienez ere.
- e) Konfiskatzea, sei hilabetez gehienez ere. Konfiskatzea mugagabea izan daiteke, 54.
- f) artikuluan zehaztutako inguruabarrak gertatzen badira.

## **56. artikulua.- Arau-hauste arinak egiteagatik ezarri beharreko zehapenak.**

1.- Arau-hauste arinak egiten direnean, zehapen hauetako bat edo gehiago jarri ahal izango dira, denak batera edo banaka:

- a) Ohartarazpena.
- b) 1.200 eurora arteko isuna.

2.- Arau-hauste arinak egiteagatik ikusleei eta erabiltzaileei jartzen zaizkien zehapenak eten egin ahal izango dira, arau-hausleek, borondatez, berriro hezteko neurriak gauzatzen badituzte; esaterako, komunitatearen aldeko zerbitzuak ematen badituzte edo heziketa-, prestakuntza- edo kultura-programetan edo antzekoetan parte hartzen badute arauz ezartzen den modu eta denboraz.

## **57. artikulua.- Zehapenen mailaketa.**

1.- Zehapenek nahitaez proportzionalak izan behar dute arau-haustea eragiten duen gertakariaren larritasunarekin. Irizpide hauek erabiliko dira arau-hauste bakoitzaren maila zehazteko:

- a) Arau-haustearen ondorio ekonomikoak eta sozialak.
- b) Arau-hausteak pertsonen segurtasunean eragin duen arriskua.
- c) Pertsonen eta ondasunen eragin zaizkien kalte kualitatibo nahiz kuantitatiboak.
- d) Araua behin eta berriz hautsi den. Araua behin eta berriz hautsi dela ulertuko da administrazio-bidean emandako ebazpen irmo baten bidez zehapena jaso duten izaera eta larritasun bereko edo bestelako arau-hauste bat edo gehiago egiten direnean urtebeteko denboran.
- e) Arau-haustea egiteko garaian zabarkeriaz edo nahita jokatu den.
- f) Lege-xedapenak betetzeko jarrera ona adierazi den. Hori egiaztatzeke, egindako kaltea konpontzeke neurriak hartu behar dira zehapen-espeditentea bukatu baino lehen.

g) Legez kontrako irabazirik lortzen den.

2.- Irizpide hauek arau-haustearen larritasuna areagotzeko erabiltzen direnean, ez dira aplikatuko.

3.- Arau-hauslearentzat onuragarriagoa izan ez dadin araua haustea arauak betetzea baino, aukera egongo da jarri beharreko zehapen ekonomikoari legez kontra lortutako irabazien kopurua gehitzeko.

### **III. KAPITULUA.- PRESKRIBATZEA ETA IRAUNGITZEA.**

#### **58. artikulua.- Arau-hausteak preskribatzea.**

1.- Arau-hauste oso larriek hiru urtera preskribatzen dute, arau-hauste larriek bi urtera, eta arau-hauste arinek urtebetera.

2.- Araua hausten den egun berean hasten da arau-haustea preskribatzeko epea. Etengabeko jardueretatik eratorritako arau-hausteetan, jarduera bukatzen den egunean hasiko da epe hori, edo arau-haustea gauzatzen den azken ekitaldian.

3.- Interesduna jakinaren gainean egonik, zehapen-prozedura hastean eteten da zehapenen preskripzioa; preskripzio-epea, bestalde, berriro hasten da zehapen-prozedura hori hilabete baino gehiagoz eteten bada ustezko erantzuleari egotzi ezin zaizkion arrazoiengatik.

#### **59. artikulua.- Zehapenak preskribatzea.**

1.- Arau-hauste oso larri jarritako zehapenek hiru urtera preskribatzen dute, arau-hauste larri jarritakoek bi urtera, eta arau-hauste arinei jarritakoek urtebetera.

2.- Zehapena ezartzen duen ebazpena irmo bihurtzen den egunaren biharamunean hasten da zehapenen preskripzio-epea.

3.- Interesduna jakinaren gainean egonik, betearazpen-prozedura hastean eteten da zehapenen preskripzioa; epea, bestalde, berriro igarotzen da prozedura hori hilabete baino gehiagoz eteten bada ustezko arau-hausleari egotzi ezin zaizkion arrazoiengatik.

#### **60. artikulua.- Prozedura iraungitzea.**

Zehapen-prozedura ebatzi eta gero, interesdunari jakinarazi behar zaio ebazpena, prozedura hasi zenetik urtebetera, gehienez ere; non eta ez den egunen kontaketa eten, Euskal Autonomia Erkidegoko herri-administrazioen zehatzeko ahalmenari buruzko otsailaren 20ko 2/1998 Legeak ezarritako gorabeheraren bat gertatu delako. Epe hori betetzen denean iraungitzen dira jarduerak, aipatutako lege horrek ezarritakoaren arabera.

## **IV. KAPITULUA.- ESKUMENA ETA PROZEDURA.**

### **61. artikulua.- Zehatzeko ahala erabiltzeko eskumena duten organoak.**

1.- Eusko Jaurlaritzako organo eskudunek abiarazi, izapidetu eta ebatziko dituzte arau-hauste oso larriak zehatzeko espedienteak.

2.- Ikuskatzeko eta kontrolatzeko eskumena duten administrazio-organoeak abiarazi, izapidetu eta ebatziko dituzte arau-hauste arin eta larriak zehatzeko espedienteak, lege honek ezarritakoarekin bat etorritik.

3.- Ikuskizunen arloko eskumenak dituen sailak erabiltzen du Eusko Jaurlaritzako zehatzeko ahala, eskudantzia hauen arabera:

a) Ikuskizunen arloko zuzendaritza eskudunak dauka eskumena Eusko Jaurlaritzak ebatzi beharreko zehapen-espedienteak abiarazi edo izapidetzeko.

b) Ikuskizunen arloko eskumenak dituen zuzendaritzako titularrari dagokio arau-hauste arin eta larriengatik jarri beharreko zehapenak jartzea.

c) Ikuskizunen arloko eskumenak dituen sailburuordetzako titularrari dagokio 60.000 euro arteko zehazpenak jartzea arau-hauste oso larriengatik, eta urtebete eta sei hilabete arteko gainerako zehapenak ezartzea.

d) Ikuskizunen arloko eskumenak dituen saileko sailburuari dagokio arau-hauste oso larriengatik jarri beharreko gainontzeko zehazpenak jartzea.

4.- Zehapen-prozedurako edozein fasetan ebatzi behar duen organoak erabakitzen badu arrazoi nahikoak daudela aditzera ematen dutenak gertakariak arau-haustea eratzen dutela baina berari ez dagokiola hori zehatzea, horren berri emango dio horretarako eskuduntzat jotzen duen organoari, eta egindako jarduera guztiak helaraziko dizkio.

5.- Aurreko ataletan aurreikusitakoa alde batera utzi gabe, udal batek arau-haustek zehatzeko ahala erabiltzeko eskumena duenean baina arau-haustek pertsegitzeari uzten dionean, Eusko Jaurlaritzako organo eskudunei ahal hori gauzatzeko eskatuko zaie, eta organo horiek beharrezko neurriak hartuko dituzte arau-haustek udalaren ordeztu eta haren kontura pertsegitzeko.

6.- Eusko Jaurlaritzako organo eskudunek eta toki-administrazioek elkarri eman behar diote izapidetzen dituzten espedienteen berri, espediente irekitzeko ebazpena ematen denetik hamar eguneko epean.

### **62. artikulua.- Zehapen-prozedura.**

Lege honetan aurreikusitako arau-hausteen ondorioz ireki eta ebazten diren zehapen-espedienteak izapidetzeko, otsailaren 20ko 2/1998 Legean aurreikusitako prozedura bete beharko da (2/1998 Legea, Euskal Autonomia Erkidegoko herri-administrazioen zigortzeko ahalmenari buruzkoa), eta azaroaren 26ko 30/1992 Legeak ezarritakoa ere



bai, osagarri moduan (30/1992 Legea, Herri-administrazioen araubide juridikoarena eta administrazio-prozedura erkidearena).

### **63. artikulua.- Behin-behineko neurriak.**

1.- Zehapen-espeditatea irekitzeko eskumena duten organoek prozedurako edozein unetan erabaki dezakete ezar litekeen ebazpenaren eraginkortasuna bermatzeko beharrezkoak eta egokiak diren behin-behineko neurriak hartzea edo prozedura ez oztopatzeke, arau-haustearen ondorioak desagerrarazteko eta pertsona eta ondasunen segurtasuna bermatzeko beharrezkoak eta egokiak diren neurriak hartzea, betiere horren aurretik entzunaldiaren izapidea egiteko bost eguneko epe arrunta eskainita interesdunei, eta ebazpen arrazoitua emanda.

2.- Egindako arau-haustearen izaera eta larritasunaren arabekoak izan behar dute behin-behineko neurri horiek. Honako hauek izango dira neurriak:

a) Lizentzia edo baimena etetea.

b) Jendaurreko ikuskizuna edo jolas-jarduera bertan behera uztea edo debekatzea.

c) Jendearentzat irekitako establezimendua aldi baterako ixtea, zigilua jarrita.

d) Jendaurreko ikuskizunarekin edo jolas-jarduerarekin lotutako ondasunak konfiskatu edo zigilatzea.

e) Birsalmentako edo baimendu gabeko salmentako sarrerak eta dirua konfiskatzea.

f) Fidantza jarraraztea.

g) Egoera bakoitzean beharrezko, egoki edo neurritzkoak jotzen diren beste neurri batzuk, betiere jendearen segurtasuna eta jendearentzat irekitako establezimenduen edo lekuen segurtasuna babeste aldera.

3.- Prozedurak irauten duen bitartean, ofizioz zein alderen batek eskatuta, behin-behineko neurriak kendu edo alda daitezke, neurriak hartu zirenean kontuan hartu ezin izan ziren gorabeherak gerora azaltzen badira. Edonola ere, dagokion zehapen-prozedurari bukaera ematen dion ebazpena ematen denean bukatzen dira neurri horiek.

### **64. artikulua.- Funtzionario ikuskatzaileek ohiz kanpoko kautelazko neurriak hartzea.**

1.- Salbuespen gisa, berehalako kautela-neurririk hartu behar bada arau-haustearen ondorioak ez luzatzeko eta pertsona eta ondasunen segurtasuna bermatzeko, interesdunei entzunaldirik eman gabe hartu ahal izango dituzte funtzionarioek kautelazko neurriak, berariazko ikuskatze-lanetan ari direla inoiz legez kontrako gertakaririk egiaztatzen badute.

2.- Funtzionarioek proportzionaltasunez jokatu behar dute, eta, egindako ikuskatze-lanaren ondoren bete beharreko aktan argi adierazi beharko dute zein kautelazko

neurri hartu dituzten, bai eta neurriok hartzeko arrazoia eta helburua zein izan diren ere.

3.- Artikulu honek arautzen dituen kautelazko neurriak ezartzen direnean, berehala abiarazi beharko da neurrioi dagokien zehapen-prozedura; hala, abiarazteko egintza horretan bertan, zehatzeko eskumena daukan organo titularrak neurri horiek errebokatu, mantendu edo aldatuko dituen adieraziko du, ondo oinarrituta, eta, segidan, aurreko artikuluko lehenengo paragrafoan zehaztutako alegazioen izapideari ekingo zaio.

4.- Artikulu honi jarraikiz hartutako kautelazko neurriak hartzen direnetik lau egun pasa ondoren dagokion zehapen-prozedura irekitzen ez bada, kautelazko neurri horiek bukatu egingo dira.

## **65. artikulua.- Arau-haustek eta zehazpenak erregistratzea.**

1.- Jendaurreko ikuskizunen eta jolas-jardueren arloko arau-hausteen eta zehapenen erkidego-mailako administrazio-erregistroa eratzen da. Bertan jasoko dira jendaurreko ikuskizun, jolas-jarduera eta establezimendu publikoen arloan egiten diren arau-hauste guztien idatzoharrak, bai eta administrazio-bidean emandako ebazpen irmo bidez arau-hausteei ezarritako zehapenen idatzoharrak ere, betiere idatzoharren araubiderako nahiz erregistroaren funtzionamendu eta antolamendurako erregelamenduz ezartzen diren baldintza eta betekizunak betez eta datuen babeserako legediari jarraituz.

2.- Erregistro hori Eusko Jaurlaritzan ikuskizunen arloko eskumena duen zuzendaritzaren menpe egongo da, eta erregelamendu bidez zehaztuko da nola antolatu eta funtzionatuko duen. Arau horrek argi ezarriko du, halaber, informazioa nola helarazi eta banatuko den prozedurak abiarazteko eta zehatzeko eskumena daukaten organoen artean.

3.- Arau-hauste batengatik jarritako zehapena ezerezten bada, arau-hauste hori ezin izango da kontuan hartu araua behin eta berriz hautsi den edo arau-haustea errepikatu den zehazteko.

## **XEDAPEN GEHIGARRIETAKO LEHENENGOA.- Kiroleko indarkeriaren kontrako estatu-mailako arauen aplikazioa.**

Gertakari bat lege honek xedatutakoaren arabera eta kiroleko indarkeria, arrazakeria, xenofobia eta intolerantziaren kontrako estatuko araudiak xedatutakoaren arabera kalifikatu eta zehatu daitekeenean aldi berean, bigarren araudi hori aplikatuko dute ikuskizunen arloko eskumena duen saileko organoek, espezialitatearen eta aginduen larritasun handienaren printzipioari jarraituz.

## **XEDAPEN GEHIGARRIETAKO BIGARRENA.- Udal-mailako ikuskizun eta jolas-jarduerak.**

1.- Jendearentzat irekitako establezimenduek, establezimenduaren eta jardueraren titularrak udala baldin bada, jarduera sailkatuaren lizentzia eskuratzeko bete behar diren baldintzak eta formalitateak bete beharko dituzte jarduera legeztatzeko.

2.- Herriko festak eta dantzaldiak direla-eta udalak berak antolatzen dituen jendaurreko ikuskizun eta jolas-jardueretan, lege honek ezarritako baldintza eta formalitateak bete beharko dira, baita ikuskizun edo jarduera baimentzeko edo alde aurreko jakinarazpena jasotzeko eskumena udalak berak duenean ere.

### **LEHENENGO XEDAPEN IRAGANKORRA.- Araubide iragankorra.**

Lege hau garatzeko arauak indarrean jarri bitartean, gaur egun indarrean dauden arauak aplikatuko dira, lege honek xedatutakoaren kontra ez doazen guztian.

### **BIGARREN XEDAPEN IRAGANKORRA.- Lizentziak eta baimenak.**

Lege hau indarrean sartu aurretik eskatutako lizentzia eta baimenak arautzeko, eskatu ziren garaian indarrean zeuden arauak hartuko dira kontuan; baina, hala ere, pertsonen eta ondasunen segurtasunari eragiten dieten baldintza teknikoak eta herritarren elkarbizitzari eragiten diotenak bete beharko dituzte, lege honek xedatutakoari jarraituz.

### **HIRUGARREN XEDAPEN IRAGANKORRA.- Legea zerbitzu-emaile baimenduei edo gaituei aplikatzea.**

Zerbitzu-emaile baimendu edo gaituei aplikatuko zaizkie alde aurreko administrazio-baimenen araubidea bete ordez alde aurreko jakinarazpena aurkeztu behar dela ezartzen duten lege honetako xedapenak. Ondorio horietarako, ulertu behar da emandako baimenak edo gaikuntzak automatikoki ordeztzen duela alde aurreko jakinarazpena.

### **LAUGARREN XEDAPEN IRAGANKORRA.- Fidantzen zenbatekoak.**

Honenbestekoak dira lege honetako 31. artikuluan aurreikusitako kasuetan ikuskizunak eta jolas-jarduerak antolatzen dituztenek jarri beharreko fidantzak, artikulatu horrek aurrekusten duen arau-garapena gertatzen ez den bitartean, eta baimendutako gehieneko edukieraren arabera:

a) Gehienez ere 700 pertsona biltzeko aurreikusitako ikuskizunak edo jolas-jarduerak: 6.000 euro.

b) 700 - 2.500 pertsona biltzeko aurreikusitako ikuskizunak edo jolas-jarduerak: 15.000 euro.

c) 2.500 pertsona baino gehiago biltzeko aurreikusitako ikuskizunak edo jolas-jarduerak: 60.000 euro.

### **BOSGARREN XEDAPEN IRAGANKORRA.- Zehapen-espedienteak.**

Lege hau indarrean sartu aurretik abiarazitako zehapen-espedienteak abiarazi ziren garaian indarrean zegoen araudiaren arabera arautuko dira, non eta ez den gertatzen lege honetako aginduak ustezko arau-hausleen aldekoagoak izatea.

### **SEIGARREN XEDAPEN IRAGANKORRA.- Lege hau barrakei eta azoketako atrakzioei aplikatzea.**

Lege honen 28. artikuluan adierazitako dokumentazio teknikorik ez duten barraken eta azoketako atrakzioen titularrek eskuratu egin beharko dute dokumentazio hori, lege hau indarrean jarri eta urtebeteko epean. Eskumena duen teknikari tituludun batek egin beharko du dokumentazio hori.

### **XEDAPEN INDARGABETZAILEA.**

Indargabetuta geratzen da Jendaurreko ikuskizunak eta jolas-jarduerak arautzeko azaroaren 10eko 4/1995 Legea. Era berean, indargabetuta geratzen dira lege honetan xedatutakoaren kontra doazen maila bereko edo beheragoko arau guztiak ere.

### **AZKEN XEDAPENETAKO LEHENENGOA.- Euskal Herriko ingurugiroa babesteko otsailaren 27ko 3/1998 Lege orokorra aldatzea.**

Aldatu egiten dira Euskal Herriko ingurugiroa babesteko otsailaren 27ko 3/1998 Lege orokorreko artikulua hauek:

BAT.- Paragrafo berri bat eranstean zaio 58. artikuluari: 4. paragrafoa; eta honela idatzita geratuko da:

*"4.- Jendaurreko ikuskizun eta jolas-jardueren legearen aplikazio-eremuan dauden establezimenduen kasuan, arau horrek ezartzen duena bete beharko da proiektu teknikoak eta Autonomia Erkidegoan ikuskizunen arloko eskumenak dituen organoaren txostenak bidaltzeari dagokionez".*

BI.- Lerrokada berri bat eranstean zaio 61. artikulua hiru paragrafoari; eta honela idatzita geratuko da:

*"Hala ere, Jendaurreko Ikuskizunen eta Jolas Jardueren Legepean dauden establezimendu publikoak aurreko paragrafoan adierazitako baldintzetan has daitezke*

*funtzionatzen, aldez aurreko jakinarazpenarekin batera aurkeztutako ziurtagiri teknikoak egiaztatzen badu horrela ez dela arriskuan jartzen pertsonen, ondasunen eta ingurumenaren segurtasuna, ezta establezimenduaren lizentzian eskatutako baldintzaren bat betetzea egiaztatzen ez den kasuetan ere. Funtzionatzen hasteak arriskua badakar, lizentzian eskatzen diren gainontzeko baldintzak betetzen dituela egiaztatu beharko du establezimenduaren titularrak, sei hilabeteko epean. Sei hilabete pasatu eta hala ere ez bada egiaztatu baldintzak betetzen direla, ondoriorik gabe geratuko da lizentzia".*

HIRU.- Eduki berria ematen zaie II. eranskinaren A) letrako 15. eta 16. paragrafoei. Honela idatzita geratuko dira aurrerantzean:

*"15.- Dantzaleku, diskoteka, gazteen diskoteka, disko-taberna, karaoke, taberna berezi, pub edo antzeko establezimenduak, bai eta zezen-plaza finkoak ere.*

*16.- Jendaurreko ikuskizunetarako edo jolas-jardueretarako beste establezimenduak, betiere honako baldintza hauetakoren bat betetzen badute:*

- 300 lagun edo gehiagorentzako ahalmen edo edukiera izatea.*
- Lau ohm-eko karga estandarrerako 50 watt-etik gorako potentzia eraginkorra duen musika-ekipoa edukitzea.*
- Indarrean dagoen arautegi teknikoaren arabera arrisku berezi handi bezala katalogatuta dagoen esparruren bat edukitzea.*
- Kultura-balioa duen eraikina izatea, eta, arkitektura aldetik den bezalakoa izanik, ezinezkoa izatea ezarritako baldintza tekniko orokorrak osorik betetzea.*
- Araubide bereziko establezimendua izatea, ikuskizun eta jolas-jardueren araudiaren arabera.*

LAU.- Eduki berria ematen zaio II. eranskinaren b) letrako 8. paragrafoari. Honela idatzita geratuko da aurrerantzean:

*"8.- Jarduera sailkatuaren aldez aurreko lizentziapen ez dauden jendaurreko ikuskizunetako edo jolas-jardueretako establezimenduak".*

## **AZKEN XEDAPENETAKO BIGARRENA.- Tasa eta prezio publikoen legea aldatzea.**

Aldatu egiten dira Euskal Autonomia Erkidegoko administrazioaren tasa eta prezio publikoei buruzko Legearen testu bategina onartzeko den irailaren 11ko 1/2007 Legegintzako Dekretuaren artikulua hauek:

BAT.- Aldatu egiten da 104. artikulua, eta honela idatzita geratuko da aurrerantzean:

### **«104. artikulua.- Zergapeko egitatea.**

*Zerbitzu hauek emateak eragiten dute tasa honen zergapeko egitatea:*

- a) Eusko Jaurlaritzako zuzendaritza eskudunak baimena ematea jendaurreko ikuskizunak eta, oro har, jolas-jarduerak egiteko.*
- b) Establezimendu publikoak ireki eta ixteko ordutegiak luzatzeko baimena ematea.*
- c) Txartelak komisioarekin saltzeko edo birsaltzeko baimena ematea.*

d) Arauzko liburuen eginbideak egitea eta agiriak jatorrizkoekin erkatuta egiaztatzea.

e) Joko eta Ikuskizun Zuzendaritzak ikuskizun-prozeduretan peritu-txostenak edo txosten teknikoak egitea.

f) Baimenik behar ez duten jendaurreko ikuskizun edo jolas-jardueren kasuan, indarrean dagoen araudiak ezarritako betekizunak betetzen ote diren egiaztatzea».

Bl.- Aldatu egiten da Euskal Autonomia Erkidegoko administrazioaren tasa eta prezio publikoei buruzko Legearen testu bategina onartzeko den irailaren 11ko 1/2007 Legegintzako Dekretuaren 107. artikulua. Honela idatzita geratuko da aurrerantzean:

**«107. artikulua.- Kuota.**

Tarifa honen arabera izango da tasaren zenbatekoa (eurotan):

1.	Ikuskizun- eta jolas-jardueretarako baimena.	
1.1	Ikuskizunetarako eta jolas-jardueretarako baimena:	52,30
1.2	Pirotekniazko lehergailuak jaurtikitzea:	139,42
2.	Zezen-ikuskizunetarako baimena.	
2.1	Zezen-ikuskizunak, oro har:	278,84
2.2	Usadiozko zezen-ikuskizunak:	52,30
2.3	Beste zezen-ikuskizun batzuk	52,30
2.4	Zezen-plaza finkoak berriz irekitzeko baimena	214,32
3.	Ordutegiak eta ikuskatzeak.	
3.1	Ordutegiak luzatzea.	
3.1.1	Kasu eta data zehatzetarako:	69,93
3.1.2	Hiru hilabetetik gorako aldietarako:	174,30
4.	Txartelak birsaltzeko baimena:	69,72
5.	Arauzko liburuen eginbideak egitea eta agiriak jatorrizkoekin erkatuta egiaztatzea.	
5.1	Liburuen eginbidea egitea. 100 orri edo zatiki bakoitzeko:	17,43
5.2	Agiriak jatorrizkoekin erkatuta egiaztatzea. Lehenengo 10 orriak:	3,49
	Hortik aurrera, 0,344081 euro jatorrizkoarekin erkatutako orri bakoitzeko.	
6.	Joko eta Ikuskizun Zuzendaritzak ikuskizun-prozeduretan peritu-txostenak edo txosten teknikoak egitea.	45,32
7.	Baimenik behar ez duten jendaurreko ikuskizun edo jolas-jardueren kasuan, indarrean dagoen araudiak ezarritako betekizunak	52,30

betetzen ote diren egiaztatzea.

HIRU.- Aldatu egiten da V. tituluaren izenburua. Hemendik aurrera, izenburu hau izango du: *“Trafiko, joko, ikuskizun, larrialdi eta segurtasun arloko tasak”*.

LAUGARRENA.- Kapitulu berri bat, VI. kapitulua, hain zuzen ere, eransten zio V. tituluari. Honela idatzita geratuko da:

**«VI. kapitulua. Ertzaintzak emandako zerbitzu bereziengatik ordaindu beharreko tasa.**

**111 septies artikulua. Zergapeko egitatea.**

*Ertzaintzak zerbitzuak emateak sorrarazten du tasa honen zergapeko egitatea, zerbitzu horiek bereziki onuragarriak badira pertsona edo erakunde jakinentzat edo, onuragarriak izan gabe ere, zuzenean eragiten badiete pertsona edo erakundeei, eta, betiere, azkeneko kasu horretan, Ertzaintzaren lana pertsona edo erakunde horiek eragindakoa bada, zuzenean edo zeharka. Hona hemen kasuak:*

*a) Ikuskizun baten unean pertsona eta ondasunentzako benetako arriskua egoteagatik, zaintza eta babes bereziko aparteko zerbitzuak ematea, irabazteko asmoarekin antolatutako jendaurreko ikuskizun jendetsu bat –kiroletakoa edo bestelakoa– behar bezala gauzatzea bermatzeko, bai ekitaldian bertan eta bai ekitaldiaren aurretik eta ondoren, ezinbesteko denboraz, ekitaldiaren esparruan edo lekuan bertan nahiz inguruetan. Halaber, kirol-zaleei eta -klubei eskolta- eta laguntza-zerbitzuak ematea.*

*b) Zinemako, publizitateko, telebistako edo bestelako filmaketetan, Ertzaintzak arautze- eta zaintze-lanak egitea, leku eta bide publikoetako zirkulazio normalari eta bideon erabilgarritasunari eragiten zaienean; betiere udalak arlo horretan dituen eskumenei kalterik egin gabe.*

*c) Herriz kanpoko bideei eragiten dieten kirol-probetan edo hirigunean eragin handiagoa daukaten kirol-probetan eskolta-, zaintza- eta babes-lanak egitea, udalaren eskumenei kalterik egin gabe.*

**111 octies artikulua. Subjektu pasiboak.**

*Honako subjektu pasibo hauek ordaindu behar dute tasa: zerbitzua behar duten ekitaldiak antolatzen dituzten pertsona fisiko edo juridikoek edo zerbitzu hori ematea eskatzen dutenek.*

**111 novies artikulua. Sortzapena.**

*Zerbitzua ematen hastearekin batera sortuko da tasa, eta bat etorriko da dagokion dotazioaren irteerarekin.*

**111 decies artikulua. Kuota.**

*1.- Kuota zehazteko, bi gauza hartuko dira kontuan: batetik, zenbat funtzionariok ematen duten zerbitzua, eta, bestetik, zenbat denbora erabiltzen duen funtzionario bakoitzak zerbitzu hori emateko.*

*2.- Tasa hau eskatuko da: 31 euro funtzionario eta orduko.*

*Ordu-zatikien kasuan, tarifako zenbatekoak proportzionalki aplikatuko dira. Honako hau izango da ekitaldi-egun bakoitzean likidatu beharreko gehieneko denbora: ekitaldiak irautean duen denbora osoa eta, hala balegokio, ekitaldia hasi aurreko eta bukatu ondorengo ordua. Ez da muga hori aplikatuko zaletu eta kirol-klubei emandako eskolta- eta laguntza-zerbitzuen likidazioa egiteko.*

*3.- Honako datu hauek zehaztu beharko dira tasa honen likidazioan, 19. artikulua ezartzen duenaz gain: parte hartu duten funtzionarioen kopurua, erabilitako denbora eta indarrean dagoen tarifaren zenbatekoa.*

**111 undecies artikulua. Salbuespenak.**

*Antolatzaileak toki-erakundeak edo irabazi-asmorik gabeko erakundeak badira, tasa ordaintzetik salbuetsita egongo dira».*

**AZKEN XEDAPENETAKO HIRUGARRENA.- Zehapenen zenbatekoak eguneratzea.**

Lege honetan adierazitako zehapenen zenbatekoak eguneratu ahal izango ditu Jaurlaritzaren Kontseiluak, indize ofizialen bidez; bai eta berraztertu ere, ondo justifikatutako egokitasun-irizpideen bidez.

**AZKEN XEDAPENETAKO LAUGARRENA. Indarrean sartzea.**

Agindu hau Euskal Herriko Agintaritzaren Aldizkarian argitaratu eta hurrengo egunean sartuko da indarrean.



## ERANSKINA

### Jendaurreko ikuskizunen, jolas-jardueren eta establezimendu publikoen katalogoa.

#### I.- JENDAURREKO IKUSKIZUNAK

- 1.- Zinema-ikuskizunak.
2. Antzerki-ikuskizunak edo arte eszenikoen ikuskizunak.
3. Musika-ikuskizunak.
4. Zirku-ikuskizunak.
5. Zezen-ikuskizunak.
6. Kirol-ikuskizunak.
7. Erakustaldiak.
8. Ikuskizun piroteknikoak eta su artifizialak.
9. Arautu gabeko ikuskizunak: ikuskizun berezi edo salbuespenezkoak, emandako araudietan bildu ezin direnak dauzkaten izaera edo ezaugarriengatik; edo, zenbait kasutan, katalogo honetan zehaztuta eta berariaz jasota ez egon arren, lokal itxietan edo aire zabalean jendaurrean egiten direnak.

#### II.- JOLAS-JARDUERAK.

- 1.- Zori, apustu eta ausazko jokoak.
2. Dibertsio-jokoak.
3. Jolas-atrakzioak.
4. Herri-zezenketak.
5. Uretako jolas-jarduerak.
6. Ostalaritzako eta aisialdiko jarduerak.
7. Catering-jarduerak.
8. Kultura- eta gizarte-jarduerak.
9. Jarduera zoologiko, botaniko eta geologikoak.
10. Herri-jai edo jai tradizionalak.
11. Kirol-jarduerak.
12. Arautu gabeko jolas-jarduerak: jolas-jarduera berezi edo salbuespenezkoak, emandako araudietan bildu ezin direnak dauzkaten izaera edo ezaugarriengatik; edo,

zenbait kasutan, katalogo honetan zehaztuta eta berariaz jasota ez egon arren, lokal itxietan edo aire zabalean egiten direnak.

### **III.- ESTABLEZIMENDU PUBLIKOAK**

#### **A. JENDAURREKO IKUSKIZUNETAKO ESTABLEZIMENDUAK**

##### **1. Kulturalak eta artistikoak:**

###### **1.1. Zinemak:**

- a) Zinema tradizionalak.
- b) Areto askoko zinemak.
- c) Udako zinemak edo aire zabalekoak.
- d) Autozinemak.
- e) Zineklubak.
- f) X zinemak.

###### **1.2. Antzokiak:**

- a) Antzoki tradizionalak.
- b) Aire zabaleko antzokiak.
- c) Aldi bateko antzokiak.
- d) Kafe-antzokiak.

###### **1.3. Entzunaretoak:**

- a) Entzunareto tradizionalak.
- b) Aire zabaleko entzunaretoak.
- c) Aldi bateko entzunaretoak.

###### **1.4. Zezen-plazak:**

- a) Zezen-plaza finkoak.
- b) Zezen-plaza eramangarriak.
- c) Aldi bateko zezen-plazak.
- d) Aisialdiko zezen-plazak.

###### **1.5. Biltzarretako pabilioiak:**

- a) Pabiloi finkoak.
- b) Aldi bateko pabilioiak.

**1.6. Kontzertu-aretoak.**

**1.7. Erakusketa- eta hitzaldi-aretoak.**

**1.8. Erabilera anitzeko aretoak.**

**1.9. Kultura-etxeak.**

**1.10. Aipatutakoen antzeko beste lokal eta instalazio batzuk.**

**2. Aisialdikoak eta jolasetarakoak:**

**2.1. Ikuskizun-kafetegiak.**

**2.2. Ikuskizun-jatetxeak.**

**2.3. Zirkuak:**

a) Zirku finkoak.

b) Aldi bateko zirkuak.

**2.4. Azoka-pabilioiak.**

**2.5. Aipatutakoen antzeko beste lokal eta instalazio batzuk.**

**3. Kirol-establezimenduak:**

a) Estadioak.

b) Frontoiak.

c) Lasterketa-zirkuituak.

d) Kirol-pabilioiak.

e) Kirol-ikuskizunetako aldi bateko instalazioak.

f) Aldi bateko hipodromoak.

g) Aipatutakoen antzeko beste lokal eta instalazio batzuk.

**4. Beste establezimendu batzuk,** diren bezalakoak izateagatik aurreko ataletan sartu ezin diren jendaurreko ikuskizunak hartzen dituztenak.

**B. JOLAS JARDUERETAKO ESTABLEZIMENDUAK:**

**1. Joko-establezimendu eta -lokalak:**

a) Kasinoak.

- b) Bingo-aretoak.
- c) Joko-aretoak.
- d) Apustu-etxeak.
- e) Hipodromoak.
- f) Kanodromoak.
- g) Jokoaren arloko araudian ezartzen diren beste lokal eta instalazio batzuk.

## **2. Jolas-establezimenduak:**

- a) Dibertsio-jokoetako aretoak.
- b) Ziberraretoak eta ziberkafetegiak.
- c) Aisialdirako eta jolaserako zentroak.
- d) Bolatokiak.
- e) Haurren ospakizunetako aretoak.
- f) Ur-parkeak.
- g) Aipatutakoen antzeko beste lokal eta instalazio batzuk.

## **3. Jolas-atrakzioetako establezimenduak:**

- a) Jolas-parkeak eta parke tematikoak.
- b) Haur-parkeak.
- c) Azoketako atrakzioak.
- d) Aipatutakoen antzeko beste lokal eta instalazio batzuk.

## **4. Kirol- eta jolas-establezimenduak:**

- a) Kirolguneak.
- b) Gimnasioak.
- c) Igerileku publikoak.
- d) Aipatutakoen antzeko beste lokal eta instalazio batzuk.

## **5. Dantza-establezimenduak:**

- a) Dantzalekuak.
- b) Diskotekak.

- c) Gazteen diskotekak.
- d) Aipatutakoen antzeko beste lokal eta instalazio batzuk.

**6. Kultura- eta gizarte-jarduerako establezimenduak:**

- a) Museoak.
- b) Liburutegiak.
- c) Ludotekak.
- d) Bideotekak.
- e) Hemerotekak.
- f) Erakusketa-aretoak.
- g) Hitzaldi-aretoak.
- h) Erakusketetako eta biltzarretako jauregiak.
- i) Liburu-azokak.
- j) Aipatutakoen antzeko beste lokal eta instalazio batzuk.

**7. Herri-azoketako eta -dantzaldietako esparruak:**

- a) Udal-ekimeneko herri-azoketako eta -dantzaldietako esparruak.
- b) Ekimen pribatuko herri-azoketako eta -dantzaldietako esparruak.

**7.1. Aipatutakoen antzeko beste lokal eta instalazio batzuk.**

**8. Jarduera zoologiko, botaniko eta geologikoko establezimenduak:**

- a) Parke zoologikoak.
- b) Akuarioak.
- c) Terrarioak.
- d) Parke edo lekune botanikoak.
- e) Parke edo lekune geologikoak.
- f) Parke edo lekune arkeologikoak.
- g) Aipatutakoen antzeko beste lokal eta instalazio batzuk.

**9. Ostalaritzako edo sukaldaritzako establezimenduak:**

Jatetxeak eta janari-postuak.

Edarien establezimenduak.

a) Jatetxeak.

b) Autozerbitzuak.

c) Kafetegiak.

d) Tabernak.

e) Taberna-kioskoak.

f) Taberna bereziak, pubak, disko-tabernak eta karaokeak.

g) Txokoak eta elkarte gastronomikoak

h) Txosnak.

i) Aipatutakoen antzeko beste lokal eta instalazio batzuk.

#### **10. Klub bereziak edo alterne-klubak.**

#### **11. Aisialdirako eta jolaserako establezimenduak:**

a) Erretzaileen elkarte pribatuak.

b) Gazteen lokalak.

**12. Beste establezimendu batzuk,** diren bezalakoak izateagatik aurreko ataletan sartu ezin diren jolas-jarduerak hartzen dituztenak.